

宋

史

五

蘇軾詩集
卷之五

PDG

本紀卷第十五

宋史十五

開府儀同三司上柱國鑾國軍事前書右丞相監修國史領經筵事

勅修

神宗二

三年春正月癸丑錄唐李氏周柴氏後乙卯詔諸路散青苗錢禁抑配戊午判尚書省張方平罷知陳州二月壬申以翰林學士司馬光為樞密副使凡九辭詔收還敕誥甲戌以河州刺史瞎欺丁本征為金紫光祿大夫檢校刑部尚書乙酉韓琦罷河北安撫使為大名府路安撫使三月丙申孫覺呂公著張戢程

顯李常上疏極言新法不聽己亥始策進士罷詩賦
論三題戊申李常言青苗歛散不實有旨具折翰林
學士兼知通進銀臺司范鎮封還詔書以為不當坐
罷職守本官壬子賜禮部奏名進士明經及第八百
二十九人乙卯詔諸路毋有留獄丙辰立試刑法及
詳刑官右正言孫覺以奉詔反覆貶知廣德軍夏四
月癸亥幸金明池觀水嬉宴射瓊林苑丙寅遼遣耶
律寬來賀同天節丁卯給兩浙轉運司度僧牒募民
入粟戊辰御史中丞呂公著貶知潁州己卯趙抃罷
知杭州以韓絳參知政事監察御史裏行程顥罷為

京西路同提點刑獄壬午右正言李常貶通判滑州
監察御史裏行張戢貶知公安縣王子韶貶知上元
縣癸未侍御史知雜事陳襄罷為同修起居注程顥
簽書鎮寧軍節度判官公事前秀州軍事判官李定
為太子中允監察御史裏行五月癸巳詔並邊州郡
毋給青苗錢太白晝見壬寅詔令司馬光詳定轉對
封事甲辰詔罷制置三司條例歸中書辛亥賜進士
蘇丕號安退處士壬子罷入閣儀丁巳詔以審官院
為東院別置西院六月癸酉日有五色雲丁丑封宗
室秦魯蔡魏燕陳越七王後為公戊寅詔修武成王

廟丙戌知諫院胡宗愈貶通判真州秋七月辛卯歐陽脩徙知蔡州壬辰呂公弼罷樞密使以知太原府馮京為樞密副使置潞州交子務戊戌雨雹癸丑詳定宗室襲封制度甲寅置三班院主簿八月戊午罷看詳銀臺司文字所丙寅以旱慮囚死罪以下遞減一等杖笞者釋之以衛州旱令轉運司振恤仍蠲租賦戊寅詔川峽福建廣南七路官令轉運司立格就注具為令遣張景憲等賀遼主生辰正旦己卯夏人犯大順城知慶州李復圭以方略授環慶路鈐轄李信慶州東路都巡檢劉甫監押种詠出戰兵少取敗

復圭誣信等違其節制斬信及劉甫种詠死於獄是
月慶州巡檢姚兕敗夏人於荔原堡鈐轄郭慶都監
高敏死之九月戊子朔中書置檢正官乙未韓絳罷
為陝西宣撫使己亥始試法官庚子曾公亮罷為司
空兼侍中河陽三城節度使辛丑以馮京參知政事
翰林學士吳充為樞密副使乙巳親策賢良方正及
武舉壬子太白晝見癸丑作東西府以居執政司馬
光罷知永興軍詔環慶陣亡義勇餘丁當刺者悉免
之冬十月辛酉詔延州毋納夏使甲子雨木冰壬申
朝謁神御殿丙子知慶州李復圭擅興兵敗績誣裨

將李信劉甫种詠以死御史劾之貶保靜軍節度副
使戊寅陳升之以母憂去位乙酉詔罷諸場務內侍
監當十一月戊子振河北饑民徙京西者己丑官節
行之士二十一人壬辰蠲陝西蕃部貸糧癸卯授布
衣王存下班殿侍三班差使宣撫司指揮使甲辰夏
人寇大順城都監燕達等擊走之庚戌詔升朝官除
南郊赦封贈父母外不得以加恩轉官乙卯以韓絳
無河東宣撫使梓州路轉運使韓琦等以能興利除
害賜帛有差十二月己未詔立諸路更戍法舊以他
路兵雜戍者遣還乙丑立保甲法丁卯以韓絳王安

石並同中書門下平章事王珪參知政事賜布衣陳
知彥進士出身知縣王輔同進士出身庚午夏人寇
鎮戎軍三川砦巡檢趙普伏兵邀擊敗之丁丑增廣
南攝官奉戊寅初行免役法賜西蕃董璘詔并衣帶
鞍馬庚辰命王安石提舉編修三司令式壬午遼遣
蕭道等來賀正旦癸未命宋敏求詳定命官使臣
過犯是歲振河北陝西旱饑除民租交趾入貢廣源
下溪州蠻來附

四年春正月丁亥朔不視朝己丑种諤襲夏兵于羅
兀北大敗之遂城羅兀自是夏人日聚兵為報復計

言者以謬為稔邊患不便壬辰王安石請鬻天下廣
惠倉田為三路及京東常平倉本從之乙未渝州夷
賊李光吉叛巡檢李宗閔等戰死命夔州路轉運使
孫構討平之詔詳定大辟覆讞法丁酉朝謁太祖太
宗神御殿庚子幸集禧觀宴從臣又幸大相國寺御
宣德門觀燈韓絳等言种諤領兵入西界斬獲甚衆
詔遣使撫問乙巳停括牧地丁未立京東河北賊盜
重法庚戌罷永興軍買鹽鈔場甲寅定文德殿朔望
視朝儀二月丁巳朔罷詩賦及明經諸科以經義論
策試進士置京東西陝西河東河北路學官使之教

導辛酉詔治吏沮青苗法者戊辰詔振河北民乏食者賻恤西界戰死軍人庚午于闐國來貢壬申進封高密郡王額為嘉王癸酉詔審官院所定人赴中書察堪任者引見甲戌賜討渝州夷賊兵特支錢丁丑禱雨詔增漳河等役兵三月丁亥夏人陷撫寧堡戊子慶州廣銳卒叛尋討平之庚寅詔給諸路學田增教官員辛卯遣使察奉行新法不職者癸卯減河東陝西路囚罪一等徒以下釋之民緣軍事科役者蠲其租賦丙午种諤坐陷撫寧堡責授汝州團練使潭州安置丁未韓絳坐與師敗劾罷以本官知鄧州辛

亥錄唐李氏後夏四月丙辰朔恤刑辛酉遼遣蕭廣
等來賀同天節壬戌遣環慶都鈐轄开贊以兵屯邠
涇河中以備西夏癸亥罷陝西交子法癸酉司馬光
權判西京留臺种諤再貶賀州別駕甲戌詔司農寺
月進諸路所上雨雪狀丙子遣使視宿亳等州災傷
仍令修飭武備壬午定進士考轉官五月甲午右諫
議大夫呂晦卒壬寅詔許富弼養疾西京丙午高麗
國來貢辛亥詔宗室率府副率以上遭父母喪及嫡
孫承重並解官行服壬子詔恩冀等州災傷遣使振
恤蠲其稅六月丁巳河北饑民為盜者減死刺配庚

申群臣三上尊號曰紹天法古文武仁孝皇帝不許
甲子歐陽修以太子少師致仕丙寅憲囚甲戌富弼
坐格青苗法徙判汝州秋七月戊子魯檀國來貢甲
午振恤兩浙水災乙未錄死事將校崔達子遇為三
班奉職丁酉監察御史裏行劉摯罷監衡州鹽倉御
史中丞楊繪貶知鄭州庚子詔宗室不得祀祖宗神
御丁未詔唐鄧給流民田八月癸丑朔高麗來貢遣
官體量陝西差役新法及民間利害甲寅詔郡縣保
甲與賊鬪死傷者給錢有差庚申復春秋三傳明經
取士癸酉遣楚建中等賀遼主生辰正旦置洮河安

撫司命王韶主之九月丙戌河決鄆州辛卯大饗明
堂以英宗配赦天下內外官進秩有差庚子夏人入
貢癸卯增選人奉冬十月壬子朔罷差役法使民出
錢募役立選人及任子出官試法丙辰置樞密院檢
詳官戊辰立太學生內外上舍法丙子詔罪人配流
遇冬者至中春乃遣十一月壬午朔詔凡賞功罰罪
事可懲勸者月頒之天下甲申詔蠲逋租丁亥作中
太一宮壬寅開洪澤河達于淮十二月辛亥朔詔增
賜國子監錢四千緡戊午歸夏俘己未安定郡王從
式薨甲子封越國公世清為會稽郡王丙寅省諸路

廂軍乙亥崇義公柴詠致仕子若訥襲封丙子遼遣
耶律紀等來賀正旦

五年春正月己丑詔聽降羌歸國己亥詔太廟時饗
以宗室使相已上攝事置京城邏卒察謗議時政者
收罪之二月壬子龜茲來貢以兩浙水賜穀十萬石
振之仍募民興水利壬戌詔罷陝西遞運銅錫癸亥
太白晝見丙寅以知鄭州呂公弼為宣徽南院使判
秦州龍圖閣直學士蔡挺為樞密副使三月甲午李
日尊卒子乾德嗣遣使弔贈戊戌富弼以司空致仕
進封韓國公立文武換官法丙午以內藏庫錢置市

易務夏四月庚戌朔立殿前馬步軍春秋校試殿最
法乙卯遼遣耶律適等來賀同天節己未括閑田置
弓箭手辛未塞北京決河五月辛巳詔以古渭砦為
安遠軍命王韶兼知軍行教閱法宗室非袒免親者
許應舉庚寅以青唐大首領俞龍珂為西頭供奉官
賜姓名包順壬辰以趙尚寬等前守唐州辟田疏水
有功增秩以勸天下丙午太白晝見行保馬法六月
壬子曾公亮以太傅致仕癸亥詔以四場試進士丙
寅作京城門銅魚符乙亥置武學秋七月壬寅初以
文臣兼樞密都承旨閏月庚戌遣中書檢正官章惇

察訪荆湖北路詔入內供奉官以下已有養子更養
次子為內侍者斬八月甲申太子少師致仕歐陽修
薨秦鳳路沿邊安撫王韶復武勝軍丁亥詔求歐陽
修所撰五代史壬辰以武勝軍為鎮洮軍癸巳遣崔
台符等賀遼主生長正旦乙未詔侍從及諸路監司
各舉有才行者一人甲辰王韶破木征于鞏令城頒
方田均稅法九月癸丑許宗室試換文資癸亥始御
便殿旬校諸軍武技丙寅少華山崩詔壓死者賜錢
貧者官為葬祭淮南分東西路冬十月戊戌升鎮洮
軍為熙州鎮洮軍節度置熙河路減秦鳳囚罪一等

十一月癸丑河州首領瞎藥等來降以為內殿崇班
賜姓名包約丁卯貶權監察御史裏行張英監荆南
稅壬申分陝西為永興秦鳳路仍置六路經略司章
惇開梅山置安化縣十二月丙子赦亡命荆湖溪洞
者丁丑詔太原置弓箭手戊寅詔寺觀奉聖祖及祖
宗陵寢神御者免役錢改溫成廟為祠壬午陳升之
為樞密使癸未雨土乙未築熙州南北關及諸堡砦
己亥遼遣蕭瑜等來賀正旦

六年春正月辛亥復僖祖為太廟始祖以配感生帝
祧順祖于夾室二月辛卯夏人寇秦州都巡檢使劉

惟吉敗之丙申永昌陵上宮東門火王韶復河州獲
木征妻子壬寅以韓絳知大名府三月己酉詔贈熙
河死事將田瓊禮賓使錄其子三人孫一人庚戌親
策進士置經局命王安石提舉辛亥試明經諸科丙
辰以四月朔日當食自丁巳避殿減膳降天下囚罪
一等流以下釋之己未置諸路學官壬戌賜奏名進
士諸科及第出身五百九十六人甲子交州來貢丁
卯宰相上表請復膳不許詔進士諸科並試明法注
官戊辰置刑獄檢法官庚午封李日尊子乾德為交
趾郡王夏四月甲戌朔日食不見乙亥御殿復膳西

南龍蕃諸夷來貢置律學丁丑遼遣耶律寧等來賀
同天節甲午定齊徐等州保甲戊戌裁定在京吏祿
五月癸卯朔播州楊貴遷遣子光震來貢以光震為
三班奉職戊申禱雨乙丑詔京東路察士人有行義
者以聞遣中書檢正官熊本措置瀘夷西京左藏庫
副使景思忠等攻燒遂州夷固戰歿錄其子昌符等
七人軍士死者賜其家錢帛差辛未西南龍蕃來貢
六月己亥置軍器監秋七月乙巳詔京西淮南兩浙
江西荆湖等六路各置鑄錢監丙午大食陀婆離來
貢己酉禱雨甲寅錄在京囚死罪以下降一等杖罪

釋之丁巳詔沿邊吏殺熟戶以邀賞者戮之乙丑分

河北為東西路丙寅夜西北有聲如礮八月壬申朔
遣賈昌衡等賀遼主生辰正旦甲申罷簡州歲貢綿
紬甲午賜熙河涇原軍士特支錢戊戌復比閭族黨
之法九月壬寅置兩浙和糴倉立歛散法戊申詔興
水利辛亥策武舉戊午岷州首領本令征以其城降
王韶入岷州丙寅太白犯斗戊辰詔禱雨決獄冬十
月辛未章惇平懿洽州蠻辛巳以復熙河洮岷疊宕
等州御紫宸殿受群臣賀解所服玉帶賜安石甲申
朝獻景靈宮丙戌振兩浙江淮饑壬辰行折二錢丁

西使遣瘞熙河戰骨十一月癸丑中太一宮成減天下

囚罪一等流以下釋之乙卯親祀太一宮丙寅大雪

詔京畿收養老弱凍餒者十二月戊子詔決開封府

囚丙申遣耶律洞等來賀正旦

七年春正月辛亥賞復岷洮等州功西京左藏庫使

桑湜等遷官有差壬子幸中太一宮宴從臣又幸大

相國寺御宣德門觀燈乙卯封皇子俊為永國公甲

子熊本平瀘夷二月辛未于闐來貢發常平米振河

陽饑民癸未詔三司歲會天下財用出入之數以聞

己丑禱雨辛卯置客省引進四方館閣門使副等員

乙未知河州景思立等與青宜結鬼章戰于踏白城
敗死廢遼州三月壬寅木征鬼章寇岷州高遵裕遣
包順等擊走之慮囚減死罪一等杖以下釋之癸卯
以旱避殿減膳乙巳白虹貫日丙午遣使分行諸路
募武士赴熙河庚戌詔熙河死事者家給錢有差罷
兩浙增額預置紬絹令諸路監司察留獄癸丑群臣
表請復膳不許丙辰遼遣林牙蕭禧來言河東疆界
命太常少卿劉忱議之己未行方田法甲子遣使報
聘于遼乙丑詔以災異求直言夏四月癸酉以旱罷
方田是日雨遼遣耶律永寧等來賀同天節乙亥王

韶破西蕃於結河川丙子御殿復膳己卯以高遵裕
為岷州團練使甲申詔邊兵死事無子孫者廩其親
屬終身乙酉王韶進築珂諾城與蕃兵連戰破之斬
首七千餘級焚三萬餘帳木征率酋長八十餘人詣
軍門降兩電丙戌王安石罷知江寧府以韓絳同中
書門下平章事監修國史翰林學士呂惠卿參知政
事置沅州丁酉詔王韶發木征及其家赴關遼遣樞
密副使蕭素議疆界于代州境上五月戊戌朔減熙
河路囚罪一等流以下釋之辛丑詔河州瘞蕃部暴
骸壬寅雨雹癸卯大雨雹辛亥罷賢良方正等科乙

丑大雨水壞陝平陸二縣六月戊寅賜討洮州將士
特支錢丁亥作渾儀浮漏廣州鳳凰見以木征為榮
州團練使賜姓名趙思忠秋七月癸卯群臣五上尊
號曰紹天憲古文武仁孝皇帝不許癸亥詔河北兩
路捕蝗又詔開封淮南提點提舉司檢覆蝗旱以米
十五萬石振河北西路災傷八月丁丑賜環慶安撫
司度僧牒以募粟振漢蕃饑民遣張芻等賀遼主生
辰正旦辛卯詔免淮南開封府來年春夫除放邢洛
等州秋稅癸巳置塲於南薰安上門給流民米集賢
院學士宋敏求上編修閣門儀制九月戊戌以時雨

降詔河北京西陝西淮南等路勸民趨耕有因事拘
繫者釋之壬子三司火癸丑置京畿河北京東西路
三十七將甲寅詔樞密院議邊防冬十月壬申詔韓
琦富弼文彥博曾公亮條代北事宜以聞戊寅詔浙
西路提舉司出米振常潤州饑庚辰置三司會計司
以韓絳提舉辛巳以河北災傷減州軍文武官員癸
巳以常平米於淮南西路易饑民所掘蝗種又振河
北東路流民十一月巳未祀天地于圜丘赦天下十
二月丙寅省熙河岷三州官百四十一員丁卯文武
官加恩巳丑遼遣耶律寧等來賀正旦是歲高麗入

貢洧并長寧夷十郡及武都夷內附

八年春正月庚子蔡挺罷判南京留司御史臺馮京
罷知亳州丙午分京東為東西路輟江南東路上供
米均給災傷州軍丁未御宣德門觀燈乙卯詔出使
廷臣所至采吏治能否以聞雨木冰戊午詔所在流
民願歸業者州縣齎遣之己未洮西安撫司以歲旱
請為粥以食羗戶饑者二月甲子增陝西錢監改鑄
大錢癸酉以王安石同中書門下平章事戊寅詔樞
密副都承旨張誠一等以李靖營陣法教殿前馬步
軍乙酉初行河北戶馬法丙戌停京畿土功七年三

月丁酉振潤州饑戊戌知河州鮮于師中乞置蕃學
教蕃酋子弟賜田十頃歲給錢千緡增解進士二人
從之庚子遼蕭禧再來遣韓鎮往河東會議癸丑知
制誥沈括報聘復振常潤饑民戊午太白晝見夏四
月乙丑詔減將作監冗官丁卯遼遣耶律景熙等來
賀同天節乙亥正僖祖禘祫東嚮位戊寅以吳充為
樞密使壬午湖南江水溢閏月乙未陳升之罷為鎮
江軍節度使判揚州廣源州劉紀寇邕州歸化州儂
智會敗之壬寅沈括上奉元曆癸卯以宣徽北院使
張方平判永興軍分秦鳳路兵為四將壬子沂州民

朱唐告前餘姚縣主簿李逢謀反辭連右羽林大將軍世居及河中府觀察推官徐革命御史中丞鄧綰知諫院范百祿御史徐禧雜治之獄具世居賜死逢革等伏誅甲寅錄趙普後乙卯詔西南蕃五姓蠻五年一入貢五月辛酉朔慮囚降死罪一等杖以下釋之甲子分環慶兵為四將丁丑雨土及黃毛甲申熙河路蕃官殿直頓埋謀叛伏誅己丑遣使振鄜延環慶饑六月乙未日上有五色雲丙午釃汴水入蔡河以通漕己酉頒王安石詩書周禮義于學官辛亥以安石為尚書左僕射兼門下侍郎戊午太師魏國公

韓琦薨己未以琦配饗英宗廟庭秋七月甲子處州
江水溢戊寅太白晝見戊子分涇原兵為五將命韓
績如河東割地八月庚寅朔日當食雲陰不見癸巳
募民捕蝗易粟苗損者償之仍復其賦丙申遣謝景
溫等賀遼主生辰正旦減官戶役錢之半詔發運司
體實淮南江東兩浙米賈州縣所存上供米毋過百
萬石減直予民斗錢勿過八十庚戌韓絳罷發河北
京東兵及監牧卒修都城丁巳大閱九月庚申朔王
安石兼修國史立武舉絕倫法冬十月庚寅呂惠卿
罷知陳州乙未禁出軫己亥詔以災異數見不御前

殺減常膳求直言壬寅赦天下罷手實法丁未彗不見丙辰御殿復膳十一月戊寅交趾陷欽州壬午立陝西蕃丁法甲申交趾陷廉州丙戌渝州改南平軍十二月丙申濬河壬寅以翰林學士元絳參知政事龍圖閣直學士曾孝寬簽書樞密院事辛亥天章閣待制趙高為安南道招討使嘉州防禦使李憲副之以討交趾癸丑遼遣耶律世通等來賀正旦甲寅熙河路木宗域首領結虎謀叛熟羌日脚族青廝扒斬其首來獻補下班殿侍

九年春正月乙丑雨木冰戊辰交趾陷邕州知州蘇

緘死之己卯下溪州刺史彭師晏及天賜州降庚辰
遣使祭南嶽南海告以南伐辛巳贈蘇緘奉國軍節
度使謚忠勇以其子子元為西頭供奉官閤門祗候二
月戊子宣徽南院使郭逵為安南道招討使罷李憲
以趙高副之詔占城占臘合擊交趾己丑宗哥首領
鬼章寇五年谷蕃官藺檀訥支等邀擊大破之己亥
以出師罷春宴乙卯雨雹三月丙辰朔進仁宗婉容
周氏為賢妃辛酉御集英殿策進士恤欽廉邕三州
死事家瘞戰亡士賊所蹂踐除其田征甲戌賜進士
諸科及第出身五百九十六人丁丑以廣西進士徐

伯祥為右侍禁欽廉白州巡檢宗哥首領鬼章寇五
牟谷熙河鈐轄韓存寶敗之庚辰以种諤知岷州夏
四月辛卯遼遣耶律庶幾等來賀同天節乙未以遼
主母喪罷同天節上壽戊戌復廣濟河漕癸卯詔廣
南亡沒士卒及百姓為賊殘破者轉運安撫司具實
并議振恤以聞甲辰給空名告身付安南以招降賞
功詔諸路募武勇赴廣西贈廣西死事將士官有差
丙午遣王克臣等弔慰于遼辛亥茂州夷寇遼遣內
副押班王中正經制甲寅遼遣耶律孝淳以國母喪
來告帝發哀成服輟視朝七日五月丙辰朔詔邕州

沿邊州峒首領來降者周惠之癸亥詔試醫學生丙寅分兩浙為東西路丁卯城茂州壬申詔安南諸軍過嶺有疾者所至護治丙子大理國來貢庚辰靜州下首領董整白等來降六月丁亥詔安南將吏視軍士有疾者月以數聞己丑綿州都監王慶崔昭用劉珪左侍禁張乂援戰茂州死之詔慶等子與借職女出嫁夫與奉職白丁王禹錫等二人賜錢其家辛卯詔濱海富民得養蠶戶毋致為外夷所誘己亥慮囚降死罪一等杖以下釋之癸卯以水源等洞蠻主儂賀等七人為定遠寧遠將軍秋七月丙辰朱崖軍黎

賊黃嬰入寇詔廣南西路嚴兵備之庚申關以西蝗
蝻蚘蚘生壬戌築下溪州改名會溪城癸亥靜州將
楊文緒結蕃部謀叛王中正斬之以徇詔廣西死事
官無子孫者許立後乙丑詔自今遇大禮推恩官昭
憲太后族一人是月安南行營次桂州郭達遣鈐轄
和斌等督水軍涉海自廣東入諸軍自廣南入八月
甲申朔齊州監務左班殿直孫紀死賊錄其一子為
三班借職戊子以文彥博守太保兼侍中行太原尹
己丑遣程師孟等賀遼主生長正旦罷鬻祠廟錢丁
酉禁北邊民闌出穀粟庚子占城來貢九月戊午濬

汴河丙寅詔罷都大制置河北河防水利司己卯遼
遣使回謝詔恤嶺南死事家表將士墓冬十月乙酉
太白晝見乙未詔東南諸路教閱新軍丙午王安石
罷判江寧府以吳充監修國史王珪為集賢殿大學
士並同中書門下平章事資政殿學士馮京知樞密
院辛亥除放沅州歸明人戶去年倚閣秋稅十一月
乙卯賜廣南東路空名告敕募入錢助軍辛酉錄唐
相魏徵後同州司士參軍道嚴流內銓特免試注官
乙亥以安南行營將士疾疫遣同知太常禮院王存
禱南嶽遣中使建祈福道場己卯詔東安撫司言包

順等破鬼章兵於多移谷壬午鬼章寇岷州知州种
諤等敗之鐵城十二月丙戌安南偽觀察使劉紀降置
司農丞庚寅子傭生丁酉詔岷州界經鬼章兵燹者
賜錢脅從來歸者釋其罪癸卯郭達敗交趾於富良
江獲其偽太子洪真李乾德遣人奉表詣軍門降達
遂班師丁未遼遣耶律運等來賀正旦庚戌詔有得
鬼章冷鷄朴首者賞之置威戎軍

十年春正月乙丑御宣德門觀燈戊辰仙韶院火不
視朝己巳白虹貫日二月甲申以崇信軍節度使宗
旦同中書門下平章事戊子以鬼章敗种諤等賞官

有差辛卯日中有黑子甲午詔宗室使相雖及十年
更不取旨磨勘丁酉詔諸州歲以十一月給老疾貧
乏者粟盡三月乃止己亥以王韶知洪州丙午以復
廣源蘇茂等州群臣表賀赦廣州囚罪一等徒以下
釋之賜行管諸軍錢民緣征役者恤其家以廣源州
為順州赦李乾德罪以郭逵判潭州趙鼎知桂州己
酉以交趾降赦廣南東路荆湖南路繫囚餘各降一
等徒以下釋之三月辛未慮囚降死罪一等杖以下
釋之士申詔州縣捕蝗夏四月辛巳復置憲州乙酉
遼遣蕭儀等來賀同天節癸巳文州蕃賊寇邊州兵

擊走之丁酉賜熙河路兵特支錢戰死者賜帛免夏
秋稅五月戊午詔修仁宗英宗史甲戌太白晝見六
月壬午注輦國朝貢癸巳王安石以使相為集禧觀
使丁未置岷州鐵城堡秋七月甲寅禱雨丁巳令諸
路歲上縣令課績辛酉群臣五上尊號曰奉天憲古
文武仁孝皇帝不許乙亥郭逵以安南失律貶為左
衛將軍丙子河決澶州曹村埽八月壬寅詔潭州置
將及增武臣一員遣蘇頌等賀遼主生辰正旦甲辰
詔侍從臺諫監司各舉文臣有才行者一人九月庚
戌詔河決害民田所屬州縣䟽淪仍蠲其稅老幼疾

病者振之乙卯詔諸傳宣內批面諭事無法守並從
中書樞密覆奏其祈恩澤規免罪者劾之辛酉詔鎮
戎德順軍各置都監一員癸酉立義倉甲戌宗樸兼
侍中封濮陽郡王冬十月戊寅朔宗樸薨癸巳昭化
軍節度使宗誼封濮國公詔濮王子以次襲封奉祀
戊戌太子太師張昇卒十一月庚午以西蕃邈川首
領董氈都首領青宜結鬼章為廓州刺史阿令骨為
松州刺史甲戌祀天地于圜丘赦天下十二月丁丑
朔占城國獻馴象壬午詔改明年為元豐甲申以郊
祀文武官加恩丁亥封子傭為均國公辛丑遼遣耶

律孝淳等來賀正旦

元豐元年春正月乙卯以王安石為尚書左僕射舒國公集禧觀使戊午命詳定郊廟禮儀詔減陳留捧日天武等軍刺員庚申御宣德門召從臣觀燈乙丑以太皇太后疾驛召天下醫者閏月辛巳以翰林侍讀學士寶文閣學士提點中太一宮呂公著無端明殿學士己丑詔贈尚書令韓琦依趙普故事壬辰樞密直學士孫固同知樞密院事己亥太傅兼侍中曾公亮薨庚子日中有黑子癸卯以公亮配饗英宗廟庭二月庚戌濮國公宗誼薨甲寅以邕州觀察使宗

暉為淮康軍節度使封濮國公戊辰詔赦安南戰棹
都監楊從先等仍論功行賞三月辛巳慮囚降死罪
一等杖以下釋之御邇英閣沈季長進講周禮八法
癸未詔内外文武官各舉堪應武舉一人廣南西路
經略司乞教閱峒丁從之乙未御崇政殿閱諸軍辰
沅瑤賊寇邊州兵擊走之夏四月己酉遼遣耶律永
寧等來賀同天節丙辰詔增置兩浙路提舉官庚申
詔除九經外餘書不得出界癸亥太白晝見乙丑封
號國公宗諤為豫章郡王戊辰塞曹村決河名其埽
曰靈平五月甲戌朔賜塞河役死家錢乙亥詔試中

刑法官以次推恩六月癸卯朔日有食之乙巳詔以
靈平功遷太常博士苗師中等各一官秋七月癸酉
朔命西上閣門使忠州團練使韓存寶經制瀘州納
溪夷已亥詔齊州預備水災辛丑夔州言甘露降八
月癸卯西邊將訥兒溫祿尊謀反伏誅丁未詔河北
被水者蠲其租甲寅遣黃履等賀遼主生辰正旦戊
午以韓絳為建雄軍節度使己巳詔濱棣滄三州被
水民以常平糧貸之庚午詔青齊淄三州給流民食
九月癸酉交趾來貢癸未李乾德表乞還廣源等州
詔不許乙酉以端明殿學士呂公著樞密直學士薛

向並同知樞密院事詔祀天地及配帝並用特牲是
月武康軍嘉禾生河中府甘露降冬十月庚戌定秋
試諸軍賞格侍禁忤全死事錄其第官為三班借職
辛亥韓存寶破瀘夷後城十有三國癸亥于闐來貢
十一月己丑命龍圖閣直學士宋敏求等詳定正旦
御殿儀注癸巳辰州徭賊叛詔沅州兵討之己亥罷
文武功臣號是月梁縣嘉禾生十二月丙午日中有
黑子凡十二日辛亥錄囚降死罪一等杖以下釋之
丙辰詔青州民王贊以復父讐免死刺配鄰州戊午
置大理寺獄己未詔罷都大提舉在京諸司庫務司

甲子以婉儀邢氏為賢妃詔罷三司推勘公事官減
軍器監勾當公事審官東院流內銓及將作監三班
院主簿左右軍巡判官丙寅遼遣耶律隆等來賀正
旦

二年春正月乙亥罷岢嵐火山軍市馬丙子詔立高
麗交易法壬午以容州管内觀察使上柱國南陽郡
開國公楊遂為寧遠軍節度使癸未詔知沅州謝麟
督捕徭賊甲申御宣德門觀燈丁亥詔以經義論試
宗室甲午京兆府學教授蔣夔乞以十哲從祀孔子
從之詔辰州叙浦縣置龍潭堡是月潁州壽州甘露

降二月甲寅詔瘞漢州暴骸日中有黑子乙卯以瀘
州夷乞弟犯邊詔王光祖等討之丙辰詔定解鹽歲
額乙丑滄州饑發倉粟振之三月庚午朔董璚遣使
來貢辛未詔給地葬畿內寄茆之喪無所歸者官瘞
之庚辰親試禮部進士壬午試特奏名進士及武舉
癸未試諸科明法賜董璚緡錢銀帛對衣金帶等物
丙戌詔雄州兩輸戶南徙者諭令復業庚寅疏汴洛
夏四月辛丑辛金明池觀水嬉宴射瓊林苑甲辰遼
遣蕭晟等來賀同天節丁巳陳升之以檢校太尉依
前同中書門下平章事鎮江軍節度使上柱國秀國

公致仕己未陳升之卒癸亥定正旦御殿儀甲子詔
增審刑院詳議詳斷官罷刑部檢法官是月南康軍
甘露降眉州生瑞竹五月丙子順州蠻叛峒兵討平
之庚辰詔以濮安懿王三夫人並稱王夫人祔濮園
辛巳太子太師致仕趙鼎上所集諫林甲申元絳罷
知亳州乙酉詔安南軍死事孤寡廩給之戊子御史
中丞蔡確參知政事六月甲辰廣西捕斬儂智春執
其妻子以獻戊申命蔡確參定編修傳法寶錄癸丑
詔五路帥臣副總管軍臣僚各舉任將領及大使臣
者二人甲寅清汴成辛酉詔鎮寧軍節度使魏國公

宗懿追封舒王是月南康軍甘露降忠州雨豆秋七月甲戌張方平以太子少師致仕戊寅詳定朝會儀已卯命中書句考四方詔獄庚辰以淮康軍節度使宗暉同中書門下平章事丁亥詳定郊廟禮儀是月陳州芝草生南賓縣雨豆瓊州甘露降八月丙申朔夏人寇綏德城都監李浦敗之辛丑分涇原路兵為十一將壬寅復八作司為東西兩司各置監官文臣一員武臣二員遣李清臣等賀遼主生辰正旦甲寅詔增太學生舍為八十齋齋三十人外舍生二千人內舍生三百人月一私試歲一公試補內舍生間歲

一舍試補上舍生以潁州為順昌軍節度是月曹州生瑞穀河陽生芝草九月癸未降順昌軍囚罪一等徒以下釋之甲申西南龍蕃來貢丁亥大宴集英殿己丑進婕妤朱氏為昭容壬辰出馬步射格鬪法頒諸軍甲午西南羅蕃方蕃來貢冬十月丙申西南石蕃來貢癸卯置籍田令詔立水居船戶五戶至十戶為一甲戊申交趾歸所掠民詔以順州賜之己酉太皇太后疾上不視事庚戌罷朝謁景靈宮命輔臣禱于天地宗廟社稷減天下囚死罪一等流以下釋之乙卯太皇太后崩戊午詔易太皇太皇園陵曰山陵

辛酉以群臣七上表始聽政命王珪為山陵使十一月癸未始御崇政殿丁亥雨土十二月乙巳御史中丞李定上國子監敕式令并學令凡百四十條丙午復置御史六察庚申遼遣蕭寧等來賀正旦是月全州芝草生桂州甘露降

本紀卷第十五

本紀卷第十六

宋史十六

開儀同三司權輿國事兼書丞相修國史領修事都總裁等奉
勅修

神宗三

三年春正月乙丑朔以次行太皇太后在殯不視朝
癸酉陞許州為潁昌府丙子降潁昌囚罪一等徒以
下釋之戊寅上太皇太后謚曰慈聖光獻戊子詔審
刑院刑部斷議官失入者歲具數罰之己丑高麗國
遣使來貢白虹貫日辛卯于闐國大首領阿令顏額
溫等來貢癸巳白虹貫日二月丙午以翰林學士章

惇參知政事丙辰始御崇政殿視朝丁巳命輔臣禱
雨三月乙丑工部侍郎同平章事吳充罷為觀文殿
大學士西太一宮使癸酉葬慈聖光獻皇后于永昭
陵丙子南丹州入貢以刺史印賜之乙酉祔慈聖光
獻皇后神主于太廟戊子降兩京河陽囚罪一等民
緣山陵役者蠲其賦己丑以慈聖光獻皇后弟昭德
軍節度使曹佺為司徒兼中書令改護國軍節度使
餘親屬加恩有差夏四月乙未觀文殿大學士吳充
薨丁酉封宗暉為濮陽郡王濮安懿王子孫皆進官
一等己亥遼遣耶律永芳等來賀同天節乙巳以瀘

州夷乞弟侵擾詔邊將討之戊申乞弟寇戎州兵官
王宣等戰歿甲寅罷群牧行司復置提舉買馬監牧
司乙卯令御史分案諸路監司庚申詔御史臺六察
以糾劾多寡為殿最任滿取旨升黜辛酉增國子監
歲賜錢六千緡五月乙丑詔自今三伏內五日一御
前殿辛巳以潁昌進士劉堂上制盜十策授徐州蕭
縣尉甲申復命韓存寶經制瀘夷詔改都大提舉導
洛通汴司為都提舉汴河堤岸司是月青州臨朐益
都石化為麩六月甲午日有五色雲戊戌詔省宗室
教授存十三員丙午詔中書詳定官制罷兵部勾當

公事官詔河北河東陝西路各選文武官一員提舉
義勇保甲壬子詔罷中書門下省主判官歸其事於
中書是月安州臨江軍產芝及連理麥秋七月庚午
河決澶州甲戌詔自今遇大禮罷上尊號癸未彗出
太微垣丙戌避殿減膳詔求直言丁亥罷群神從祀
明堂戊子太白晝見八月乙巳罷省寺監官領空名
者癸丑遣王存等賀遼主生辰正旦戊午彗不見九
月壬戌增宣祖定州東安墳地二十頃及守園戶丙
寅御殿復膳乙亥正官名以開府儀同三司易中書
令侍中同平章事特進易左右僕射自是以下至承

務郎易祕書省校書郎正字將作監主簿有差檢校僕射以下及階散憲銜並罷詳在職官志辛巳大饗明堂以英宗配赦天下癸未薛向孫固並為樞密副使乙酉詔即景靈宮作十一殿以時王禮祠祖宗以王安石為特進改封荊國公丙戌進封岐王顥為雍王嘉王顥為曹王並為司空文彥博為太尉封曹侂為濟陽郡王宗旦為華陰郡王馮京為樞密使薛向罷知潁州丁亥以呂公著為樞密副使閏九月乙卯加文彥博河東永興軍節度使以富弼為司徒十一月己丑朔日當食雲陰不見十二月甲辰遼遣蕭偉等來賀正旦

四年春正月乙未命步軍都虞候林廣代韓存寶經制
瀘夷庚子詔試進士加律義辛亥子聞來貢馮京罷知
河陽孫固知樞密院龍圖閣直學士韓縝同知樞密院
事二月辛未置秦州鑄錢監己卯分東南團結諸軍為
十三將三月乙未詔在京官毋舉辟執政有服親癸卯
章惇罷知蔡州甲辰以翰林學士張璪參知政事乙巳
命官閱九軍營陣法於京城南戊申大閱丙辰董璚遣
使來貢夏四月癸亥遣耶律祐等來賀同天節御延
和殿閱試保甲己巳詔罷南郊合祭天地自今親祀北
郊如南郊儀有故不行則以上公攝事壬申慮囚山陰

縣主簿余行之謀反伏誅乙酉河決澶州小吳埽五月
丁酉詔河東路提點刑獄劉定專振被水民戊申封晉
程嬰為成信侯公孫杵臼為忠智侯立廟于絳州六月
戊午河北諸郡蝗生癸未命提點開封府界諸縣公事
楊景略提舉開封府界常平等事王得臣督諸縣捕
蝗秋七月己丑太白晝見庚寅西邊守臣言夏入囚
其主秉常詔陝西河東路討之甲午廊延涇原環慶
熙河麟府路各賜金銀帶綿襖銀器鞍轡象笏甲辰
韓存寶坐逗遛無功伏誅丁未大軍進攻米脂砦已
酉詔曾鞏充史館修撰專典史事詔內外官司舉官

悉罷令大理卿崔台符同尚書吏部審官東西三班
院議選格八月乙卯朔罷中書堂選悉歸有司丙辰
詔蠲河北東路災傷州軍今年夏料役錢辛酉夏人
寇臨川堡詔董氈會兵伐之以金州刺史燕達為武
康軍節度使己巳復置滑州丁丑熙河經制李憲敗
夏人于西市新城獲酋首三人首領二十餘人庚辰
又襲破于女遮谷斬獲甚衆辛巳司馬光趙彥若上
所脩百官公卿年表十卷宗室世表三卷九月乙酉
董氈遣使來貢且言己遣首領洛施軍篤喬阿公等
將兵三萬會擊夏國李憲復蘭州古城戊子蘭州新

順首領巴令謁等三族率所部兵攻夏人撒逋宗城
敗之己亥王珪上國朝會要壬寅闕河北保甲于崇
政殿官其優者三十六人甲辰詳定郊廟奉祀禮儀
丙午詔諭夏主左右并嵬名部族諸部首領並許自
歸戊申太白犯斗庚戌夏兵救米脂砦廊延經略副
使种諤率衆擊破之辛亥种諤又敗夏人于無定川
十月丁巳米脂砦降己未拂菻國來貢庚申熙河兵
至女遮谷與夏人遇戰敗之乙丑涇原兵至磨哆隘
遇夏人與其統軍梁大玉戰敗之追奔二十里斬大
首領沒囉卧沙監軍使梁格嵬等十五級獲首領統

軍姪訖多埋等二十二人已入銀州庚午環慶行
營經略使高遵裕復通遠軍种諤遣曲珍等領兵通
黑水安定堡路遇夏人與戰破之斬獲甚衆癸酉復
韋州乙亥李憲敗夏人于屈吳山丁丑曲珍與夏人
戰于蒲桃山敗之戊寅种諤入貢州詔諸將存撫降
人辛巳史館修撰曾鞏乞收采名臣高士事迹遺文
詔從之涇原節制王中正入宥州十一月癸未朔日
有食之丁亥諸軍合攻靈州种諤敗夏人于黑水已
丑李憲敗夏人于羅逋川辛卯种諤降橫河平人戶
破石堡城斬獲甚衆辛丑師還癸卯种諤至夏州索

家平兵衆三萬人以無食而潰丙午高遵裕以師還
夏人來追遂潰十二月辛未林廣破乞弟于納江乙
亥慈聖光獻皇后禪祭宰臣王珪等上表請聽樂不
許自是五表乃從之戊寅遼遣蕭福全等來賀正旦
五年春正月癸未朔不受朝丙申御宣德門觀燈己
亥白虹貫日庚子責授高遵裕郢州團練副使本州
安置乙巳作新渾儀浮漏辛亥詔再議西討以熙河
經制李憲為涇原熙河蘭會安撫制置使李浩權安
撫副使二月癸丑朔頒三省樞密六曹條制詔廊延
軍士病不能歸者賜其家絹十匹丙辰以乞弟平班

師辛酉詔董璚首領結隣死者朝辭物給其子董訥
支蘭璚增賜絹百匹癸亥華陰郡王宗旦薨丁卯封
武昌軍節度觀察留後宗惠為江夏郡王癸酉以出
師赦梓州路減囚罪一等民緣軍事役者蠲其賦封
董璚為武威郡王丙子渤泥來貢三月壬辰親策進
士甲午策武舉己亥以日當食避殿減膳赦天下降
死罪一等流以下原之詔杭州歲修吳越王墳廟壬
寅鄜延路副總管曲珍敗夏人于金湯乙巳賜進士
諸科出身千四百二十八人丙午雨土夏四月壬子
朔日食不見甲寅御殿復膳丁巳遼遣耶律永端等

來賀同天節己未沈括奏遣曲珍將兵綏德城應援
討葭蘆塞左右見聚羌落詔從之乙丑以直龍圖閣
徐禧知制誥權御史中丞癸酉官制成以王珪為尚
書左僕射兼門下侍郎蔡確為尚書右僕射兼中書
侍郎甲戌太中大夫章惇為門下侍郎張璪為中書
侍郎翰林學士蒲宗孟為尚書左丞翰林學士王安
禮為尚書右丞錄唐段秀實後復其家丁丑同知樞
密院呂公著罷知定州五月辛巳朔行官制丁亥賞
平蠻將士有差癸巳豐州卒張世矩等作亂伏誅其
黨王安以母老詔特原之作尚書省戊戌詔兩省官

人舉可任御史者各二人甲辰遣給事中徐禧治鄜
延邊事六月辛亥朔環慶經略司遣將與夏人戰破
之斬其統軍嵬名姝精嵬副統軍訛勃遇甲寅王珪
上兩朝史戊午詔修兩朝寶訓詔以成都路供給瀘
州邊事曲赦免二稅甲子改翰林醫官院為醫官局
壬申交趾獻馴犀二癸酉豫章郡王宗諤薨戊寅曲
珍等敗夏人于明堂川作天源河秋七月辛巳廣西
經略司言知宜州王奇與賊戰敗績壬午詔罷大理
寺官赴中書省讞案戊子詔御史中丞舒亶舉任言
事或察官十人辛卯詔尚書考功員外郎蔡京編手

詔庚子以蔡京為起居郎仍同詳定官制丁未垂拱
殿宴修史官已酉始建雩壇祀上帝以太宗配八月
庚戌朔封御侍武氏為才人壬子進封均國公傭為
延安郡王以昭容朱氏為賢妃庚申帝有疾詔歲以
四孟月朝獻景靈宮辛未遣韓忠彥等賀遼主生辰
正旦鳳州團練使种諤以行軍迂道降授文州刺史
壬申詔罷增減幕職州縣官奉甲戌城永樂戊寅河
決原武九月丁亥夏人三十萬衆寇永樂曲珍戰不
利裨將寇偉等死之夏人遂圍城己丑帝以疾愈降
京畿囚罪一等徒以下釋之士辰遣使行視畿縣民

被水患者乙未詔張世矩等將兵救永樂砦戊戌永樂陷給事中徐禧內侍李舜舉陝西轉運判官李稷死之己亥詔客省引進四方館東西上閤門各置使副等職庚子安化蠻寇宜州知州王奇死之詔贈忠州防禦使辛丑賞董璚將士有差癸卯滑州河水溢冬十月辛亥洛口廣武大河溢甲寅知延州沈括以措置乖方責授均州團練副使隨州安置鄜延路副都總管曲珍以城陷敗走降授皇城使丙辰脩定景靈宮儀乙丑詔贈永樂死事臣徐禧金紫光祿大夫吏部尚書李舜舉昭化軍節度使並賜謚忠愍李稷

朝奉大夫工部侍郎入內高品張禹勤皇城使各推
恩賜贈有差癸酉貶知太原府資政殿大學士呂惠
卿知單州十一月戊寅朔罷御史察諸路壬午景靈
宮成告遷祖宗神御癸未初行酌獻禮乙酉以奉安
神御赦天下官與享大臣子若孫一人庚寅紫宸殿
宴侍祠官十二月丁巳新樂成以賢妃周氏為德妃
辛酉塞原武決河丙寅休日御延和殿引進對官十
人辛未西南龍蕃來貢壬申遼遣耶律儀等來賀正
旦丙子錄永樂死事將皇城使寇偉等十三人及東
上閣門副使景思誼等九十人贈賜有差

六年春正月丁丑朔御大慶殿受朝始用新樂儀鸞
司徹幕屋壞毀玉輅甲申白虹貫日丁亥朝獻景靈
宮己丑層壇入貢庚寅御宣德門觀燈癸巳詔御史
六察罷上下半年更易法乙未詔修周漢以來陵廟
乙巳御崇政殿閱武士丙午封楚三閭大夫屈平為
忠潔侯二月丁未夏人數十萬衆攻蘭州鈐轄王文
郁率死士七百餘人擊走之丙辰以夏人犯蘭州貶
熙河經略使李憲為經略安撫都總管以王文郁為
西上閣門使知蘭州副使李浩為四方館使甲子詔
供備庫使高遵治西京左藏庫副使張壽各降一官

三月辛卯夏人寇蘭州副總管李浩以衛城有功復隴州團練使乙未休日御延和殿引進對官八人丙申河東將薛義敗夏人于葭蘆西嶺戊戌以檢校太尉上柱國太原郡開國公王拱辰為武安軍節度使麟府州將郭忠詔等敗夏人于乜離抑部詔行賞有差己亥河東將高永翼敗夏人于真卿流部夏四月己酉朝獻景靈宮辛亥遼遣蕭固等來賀同天節甲子禮部郎中林希上兩朝寶訓李浩敗夏人于巴義谿辛未雨壬申御邇英閣蔡卞進講周禮五月丙子朔于闐入貢甲申以時暑趣決開封大理獄庚寅

以旱慮囚甲午夏人寇蘭州右侍禁韋定死之癸卯
詔賜資州孝子支漸粟帛是月夏人寇麟州知州訾
虎敗之六月乙巳朔詔御史臺六察各置御史一員
癸丑詔御史中丞兩省官各舉可任言事或監察御
史五人閏月乙亥朔夏主秉常請修貢許之戊寅詔
陝西河東毋輒出兵丙戌詔内外文武各舉應武舉
一人汴水溢丙申太師守司徒韓國公富弼薨謚文
忠秋七月乙卯祔孝惠孝章淑德章懷皇后于廟丙
辰以四后祔廟降京畿囚罪一等流以下原之孫固
罷知河陽以同知樞密院韓縝知樞密院戶部尚書

安燾同知樞密院戊午朝獻景靈宮八月丙子賜升
祔陪祠官宴于尚書省己卯太白晝見乙酉遣蔡京
等賀遼主生辰正旦辛卯蒲宗孟罷王安禮為尚書
左丞吏部尚書李清臣為尚書右丞九月癸卯朔日
有食之冬十月癸酉朔秉常遣使上表請復修職貢
乞還舊疆戊子封孟軻為鄒國公癸巳會稽郡王世
清薨庚子尚書省成辛丑封馬援為忠顯王十一月
癸卯加上仁宗謚曰體天法道極功全德神文聖武
睿哲明孝皇帝英宗曰體乾應曆隆功盛德憲文肅
武睿神宣孝皇帝甲辰朝獻景靈宮乙巳朝享太廟

丙午祀昊天上帝于圜丘赦天下甲寅文彥博以太師致仕乙卯以觀文殿大學士韓絳為建雄軍節度使庚申幸尚書省官執政五服內未仕者一人進尚書以下官一等

七年春正月丙午封洺州防禦使世準為安定郡王癸丑夏人寇蘭州李憲等擊走之甲寅以賢妃朱氏為德妃二月甲戌太師文彥博入覲置酒垂拱殿癸未進封濮陽郡王宗暉為嗣濮王封宗晟為高密郡王宗綽為建安郡王宗隱為安康郡王宗瑗為漢東郡王宗愈為華原郡王三月辛丑賜文彥博宴于瓊

林苑帝製詩以賜之庚申御崇政殿大閱壬戌詔賜
鬼章寫經紙還其所獻馬癸亥白虹貫日夏四月辛
未大食國來貢乙亥遼遣蕭浹等來賀同天節丁丑
賜饒州童子朱天錫五經出身丙戌景靈宮天元殿
門生芝草六本壬辰朝獻景靈宮癸巳夏人寇延州
安塞堡將官呂真敗之五月壬子慮囚降死罪一等
杖以下釋之辛酉白虹貫日壬戌以孟軻配食文宣
王封荀況楊雄韓愈為伯並從祀詔諸路帥臣監司
等舉大使臣為將領六月丙子夏人寇德順軍巡檢
王友死之辛卯江夏郡王宗惠薨秋七月甲辰伊洛

濫河決元城丙午遣使振恤賜溺死者家錢壬子朝
獻景靈宮甲寅王安禮罷八月庚午詔王光祖遣人
招諭乞弟許出降免罪補官是歲乞弟死辛巳遣陳
睦等賀遼主生辰正旦九月壬寅西南龍蕃來貢乙
巳三佛齊來貢乙丑夏人圍定西城熙河將秦貴敗
之冬十月乙亥夏人寇熙河庚辰饒州童子朱天申
對于睿思殿賜五經出身辛巳朝獻景靈宮戊子詔
分畫交趾界以六縣二峒賜之乙未夏人寇靜邊砦
涇原將彭孫敗之十一月丁酉朔寇清邊砦將白
玉李貴死之甲辰夏國主秉常遣使來貢乙卯太白

書見十二月戊辰端明殿學士司馬光上資治通鑑以光為資政殿學士降詔獎諭庚寅詔門下中書外省官同舉言事御史辛卯遼遣耶律襄等來賀正旦是歲河東饑河北水壞洺州廬舍燬其稅

八年春正月戊戌帝不豫甲辰赦天下乙巳命輔臣代禱景靈宮乙卯分遣群臣禱于天地宗廟社稷二月辛巳開寶寺貢院火丁亥命禮部鎖試別所癸巳上疾甚遷御福寧殿三省樞密院入見請立皇太子及請皇太后權同聽政許之三月甲午朔立延安郡王傭為皇太子賜名煦皇太后權同處分軍國事乙

未赦天下遣官告于天地宗廟社稷諸陵丁酉皇太后命吏部尚書曾孝寬為冊立皇太子禮儀使戊戌上崩于福寧殿年三十有八皇太子即皇帝位尊皇太后為太皇太后皇后為皇太后德妃朱氏為皇太妃太皇太后權同處分軍國事九月己亥上大行皇帝謚曰英文烈武聖孝皇帝廟號神宗十月乙酉葬于永裕陵

贊曰帝天性孝友其入事兩宮必侍立終日雖寒暑不變嘗與岐嘉二王讀書東宮侍講王陶講論經史輒相率拜之由是中外翕然稱賢其即位也小心謙

抑敬畏輔相求直言察民隱恤孤獨養耆老振匱乏
不治宮室不事遊幸厲精圖治將大有為未幾王安
石入相安石為人悻悻自信知祖宗志吞幽薊靈武
而數敗兵帝奮然將雪數世之耻未有所當遂以偏
見曲學起而乘之青苗保甲均輸市易水利之法既
立而天下洶洶騷動慟哭流涕者接踵而至帝終不
覺悟方斷然廢逐元老擯斥諫士行之不疑卒致祖
宗之良法美意變壞幾盡自是邪佞日進人心日離
禍亂日起惜哉

本紀卷第十六

本紀卷第十七

宋史十七

開儀司上柱國錄國事前行書丞相監修國史領經事鄒總教勝等奉
勅修

哲宗一

哲宗憲元繼道顯德定功欽文膺武齊聖昭孝皇帝
諱煦神宗第六子也母曰欽聖皇后朱氏熙寧九年
十二月七日己丑生于宮中赤光照室初名傭授檢
校太尉天平軍節度使封均國公元豐五年遷開府
儀同三司彰武軍節度使進封延安郡王七年三月
神宗宴群臣于集英殿王侍立天表粹溫進止中度

宰相而下再拜賀八年二月神宗寢疾宰相王珪乞
早建儲為宗廟社稷計又奏請皇太后權同聽政神
宗首肯三月甲午朔皇太后垂簾于福寧殿諭珪等
曰皇子性莊重從學穎悟自皇帝服藥手寫佛書為
帝祈福因出以示珪等所書字極端謹珪等稱賀遂
奉制立為皇太子初太子宫中常有赤光至是光益
熾如火戊戌神宗崩太子即皇帝位己亥大赦天下
常赦所不原者群臣進秩賜賚諸軍遣使告哀于遼
白虹貫日庚子尊皇太后曰太皇太后皇后曰皇太
后德妃朱氏曰皇太妃命宰臣王珪為山陵使甲寅

以群臣固請始同太皇太后聽政己未賜叔雍王顥
曹王顥贊拜不名令中外避太皇太后父遵甫名詔
邊事稍重者樞密院與三省同議以進庚申尚書左
僕射郇國公王珪進封岐國公顥進封揚王顥為荆
王並加太保弟寧國公佖為遂寧郡王儀國公佖為
大寧郡王成國公佖為咸寧郡王和國公佖為普寧
郡王高密郡王宗晟漢東郡王宗瑗華原郡王宗愈
安康郡王宗隱建安郡王宗綽並為開府儀同三司
太師潞國公文彥博為司徒濟陽郡王曹佺為太保
特進王安石為司空餘進秩賜致仕服帶銀帛有差

辛酉詔顏子孟子配享孔子廟庭夏四月丙寅初御
紫宸殿辛未蠲元豐六年以前逋賦甲戌加李乾德
同中書門下平章事董氈檢校太尉詔曰先皇帝臨
御十有九年建立政事以澤天下而有司奉行失當
幾於煩擾或苟且文具不能布宣實惠其申諭中外
協心奉令以稱先帝惠安元元之意乙亥詔以太皇
太后生日為坤成節丁丑召呂公著侍讀諭樞密中
書通議事都堂詔遵先帝制遣官察舉諸路監司之
法庚辰呂惠卿遣兵入西界破六砦斬首六百餘級
辛巳遣使以先帝遺留物遺遼國及告即位甲申水

部負外郎王諤非職言事坐罰金丙戌以蕃官高福
戰死錄其子孫丁亥復蠲舊年逋賦五月丙申詔百
官言朝政闕失資政殿學士司馬光過闕入見丁酉
群臣請以十二月七日為興龍節壬寅城熙蘭通遠
軍賜李憲趙濟銀帛有差甲辰作受命寶丙午京師
地震復置遼州庚戌王珪薨改命蔡確為山陵使丙
辰賜禮部奏名進士諸科及第出身四百六十一人
戊午以蔡確為尚書左僕射兼門下侍郎韓縝為尚
書右僕射兼中書侍郎章惇知樞密院司馬光為門
下侍郎六月庚午賜楚州孝子徐積絹米丁亥詔中

外臣庶許直言朝政闕失民間疾苦秋七月戊戌以
資政殿大學士呂公著為尚書左丞詔府界三路保
甲罷團教丙午遼人來吊祭丙辰白虹貫日吏部侍
郎熊本奏歸化儂知會異同坐罰金罷沅州增脩堡
砦八月乙丑詔按察官所至有才能顯著者以名聞
已巳鎮江軍節度使韓絳進開府儀同三司癸酉遣
使賀遼主生辰正旦乙亥以供奉王英戰死葭蘆錄
其子九月戊戌以神宗英文烈武聖孝皇帝之謚告
于天地宗廟社稷己亥上寶冊于福寧殿己酉遣使
報謝于遼冬十月甲子夏國遣使進助山陵馬癸酉

詔倣唐六典置諫官丁丑令侍從各舉諫官二人詔
監察御史兼言事殿中侍御史兼察事罷義倉己卯
詔均寬民力有司或致廢格者監司御史糾劾之河
決大名乙酉葬神宗皇帝于永裕陵丙戌罷方田以
夏國主母卒遣使吊祭十一月癸巳詔按問強盜欲
舉自首者毋減丁酉祧翼祖祔神宗于太廟廟樂曰
大明之舞辛丑減兩京河陽四罪一等杖已下釋之
民緣山陵役者蠲其賦己酉遼遣使賀即位十二月
壬戌于闐進獅子詔却之開經筵講魯論讀三朝寶
訓罷太學保任同罪法丙寅夏人以其母遺留物馬

白駝來獻辛未左僕射蔡確右僕射韓頴並遷秩加
食邑揚王顥荆王頴並為太傅壬申章惇司馬光等
進秩有差甲戌罷後苑西作院乙亥詔執政侍臣講
讀戊寅罷增置鑄錢監十有四乙酉遼遣蕭瑋等來
賀正旦是歲日有五色雲者六高麗大食入貢

元祐元年春正月庚寅朔改元丙午錄在京囚減死
罪以下一等杖罪者釋之丁未詔回賜高麗王鞍馬
服帶器幣有加罷陝西河東元豐四年後凡緣軍興
添置官局丙辰久旱幸相國寺祈雨立神宗原廟戊
午甘露降二月辛酉以河決大名壞民田民艱食者

衆詔安撫使韓絳振之乙丑脩神宗實錄丁卯詔左
右侍從各舉堪任監司者二人舉非其人有罰庚午
禁邊民與夏人為市辛未董氈卒以其子阿里骨襲
河西軍節度使邈川首領庚辰夏人入貢辛巳刑部
侍郎蹇周輔坐變鹽法落職閏月庚寅蔡確罷以司
馬光為尚書左僕射門下侍郎詔韓維呂大防孫永范
純仁詳定役法壬辰以呂公著為門下侍郎丙午守
尚書右丞李清臣為尚書左丞試吏部尚書呂大防
為尚書右丞白虹貫日丁未群臣上太皇太后宮名
曰崇慶殿曰崇慶壽康皇太后宮曰隆祐殿曰隆祐

慈徽庚戌賜于闐國王服帶器幣辛亥章惇罷甲寅
詔侍從御史國子司業各舉經明行脩可為學官者
二人乙卯以吏部尚書范純仁同知樞密院事丙辰
掩京城暴骸罷諸州常平管勾官三月辛未詔毋以
堂差衝在選已注官置訴理所許熙寧以來得罪者
自言命太學公試司業博士主之如春秋補試法祭
酉置開封府界提點刑獄一員乙亥罷熙河蘭會路
經制財用司己卯復廣濟河輦運辛巳詔民間疾苦當
議寬恤者監司具聞以程頤為崇政殿說書乙酉許
職事官帶職夏四月己丑韓縝罷辛卯詔諸路旱傷

蠲其租壬辰以旱慮凶癸巳王安石薨辛丑詔執政大臣各舉可充館閣者三人壬寅以呂公著為尚書右僕射兼中書侍郎文彥博平章軍國重事乙巳詔戶部裁冗費著為令李憲等以用兵失利為劉摯所劾貶秩奉祠辛亥楊王顥荆王顥並特授太尉詔遇科舉令外朝官各舉經明行脩之士一人俟登第日與升甲罷誦禁之制知誠州周士隆撫納溪洞民一千三百餘戶賜士隆銀帛癸丑定六曹郎官員數五月丁巳朔以資政殿大學士韓維為門下侍郎罷諸路重祿復熙寧前舊制庚申夏人來賀即位壬戌詔

侍從臺官監司各舉縣令一人戊辰命程頤同脩立
國子監條制己巳幸揚王荆王第官其子九人癸酉
復左右天廐坊壬午詔文彥博班宰相之上六月甲
辰置春秋博士呂惠卿落職分司南京蘇州居住戊
申以富弼配享神宗廟庭庚戌太白晝見甲寅詔正
風俗脩紀綱勿理隱疵細故復置通利軍程頤上疏
論輔養君德秋七月丁巳置檢法官辛酉設十科舉
士法劉恕同脩資治通鑑未沾恩而卒詔官其子乙
丑夏國主秉常卒庚午夏國遣使賀坤成節八月辛
卯詔常平依舊法罷青苗錢壬辰封弟偲為祁國公

甲午占城國遣使入貢壬子日傍有五色雲磁州穀
異龍同穗九月丙辰朔司馬光薨己未朝獻景靈宮
辛酉大享明堂以神宗配赦天下丁卯試中書舍人
蘇軾為翰林學士知制誥己卯張璪罷冬十月丙戌
改衍聖公為奉聖公庚寅太白晝見壬辰夏人來告
哀庚子遣使吊祭十一月戊午以尚書左丞呂大防
為中書侍郎御史中丞劉摯為尚書右丞乙亥于闐
國遣使入貢庚辰蠲鹽井官溪錢十二月庚寅詔將
來服除依元豐三年故事群臣勿上尊號戊戌華州
鄭縣小敷谷山崩戊申詔以冬溫無雪決繫囚是歲

河北楚海諸州水

二年春正月乙丑封秉常子乾順為夏國主戊辰詔
舉人程試主司毋得於老莊列子書命題辛巳詔蘇
轍劉放編次神宗御製白虹貫日二月丁亥遣左司
諫朱光庭使河北振民被災者詔施黔戎瀘等州保
甲監司免歲闋丁酉加賜于闐國金帶錦袍器幣已
亥命吏部選人改官歲以百人為額辛丑詔陝西河
東行策應牽制法是月代州地震三月壬戌太皇太
后手詔止就崇政殿受冊戊辰詔中外侍從歲舉郡
各一人令御史臺察民俗奢僭者夏人遣使入謝祭

酉奉安神宗神御于景靈宮宣光殿庚辰詔內侍省
供奉官以下百人為額夏四月丙戌交趾入貢丁亥
鬼章子結吮齧寇洮東戊子慮囚己丑詔太師文彥
博十日一議事都堂辛卯詔冬夏旱暵海內被災者
廣避殿減膳責躬思過以圖消復丁酉以四方牒訴
上尚書者或冤抑不得直令御史分察之己亥太皇
太后以旱權罷受冊禮癸卯雨乙丑以徐州布衣陳
師道為亳州司戶叅軍丁未復制科戊申御殿復膳
李清臣罷五月癸丑夏人圍南川砦丁卯以劉摯為
尚書左丞兵部尚書王存為尚書右丞壬申于闐入

貢丁丑詔御史官闕中丞御史翰林學士兩省諫
議大夫以上雜舉六月辛丑以安燾知樞密院事壬
寅有星如瓜出文昌丙午邈川首領結藥來降授三
班奉職秋七月辛亥詔戶部修會計錄韓絳以司空
致仕夏人寇鎮戎軍詔府界三路教閱保甲復課利
塲務虧額科罰丙辰罷諸州數外歲貢戊午以遼蕭
德崇等賀坤成節曲宴垂拱殿始用樂庚申進封李
乾德為南平王辛酉改誠州為渠陽軍辛未韓維罷
八月辛巳程頤罷經筵權同管勾西京國子監癸未以
西蕃寇洮河民被害者給錢粟死者賜帛其家詔復

進納人改官舊法乙酉命呂大防為西京安奉神宗御容禮儀使庚寅西南蕃遣人入貢癸巳以夏國政亂主幼強臣乙逋等擅權逆命詔諸路帥臣嚴兵備之庚子授西蕃首領心牟欽氈銀州團練使溫溪心瓜州團練使辛丑涇原言夏人寇三川諸砦官軍敗之丁未岷州行營將种誼復洮州執蕃酋鬼章青宜結九月乙卯發太皇太后冊寶于大慶殿丙辰發皇太后皇太妃冊寶于文德殿己未夏人寇鎮戎軍丁卯禁私造金箔冬十月壬午奉安神宗御容于會聖宮及應天院癸未日有五色雲戊子恭謝景靈宮辛

卯減西京囚罪一等杖已下釋之己亥西南龍張蕃遣人入貢庚子論復洮州功种誼等遷秩賜銀絹有差十一月丙辰復置漣水軍庚申獻鬼章于崇政殿以罪當死聽招其子及部屬歸以自贖乙亥大雪甚民凍多死詔加振恤死無親屬者官瘞之罷內殿承制試換文資格丙子決囚十二月乙酉賜諸軍及貧民錢丙戌興龍節初上壽于紫宸殿己丑大寒罷集英殿宴壬辰元征聲延部族老幼萬人渡河南遣使廩食之仍諭聲延勿失河北地乙未白虹貫日壬寅頒元祐勅令式是冬始閉汴口

三年春正月己酉朔不受朝庚戌復廣惠倉己未朝
獻景靈宮庚申雪寒發京西穀五十餘萬石損其直以
紓民辛酉詔廣南西路朱崖軍開示恩信許生黎悔
過自新壬戌罷上元遊幸壬申阿里骨奉表詣闕謝
罪令邊將無出兵仍罷招納甲戌決囚二月甲申罷
修金明池橋毀乙酉德音減囚罪一等徒以下釋之
工役權放一年流民饑貧量與應副丙戌詔河東苦
寒量度存恤戌兵癸巳罷春宴乙未白虹貫日辛丑
太白晝見乙巳廣東兵馬監童政坐擅殺無辜伏誅
三月丙辰韓絳薨丁巳御集英殿策進士戊午策武

舉已已賜禮部奏名進士諸科及第出身一千一百
二十二人乙亥夏人寇德靜砦將官張誠等敗之夏
四月戊寅令諸路郡邑具後法利害以聞辛巳以呂
公著為司空同平章軍國事呂大防為尚書左僕射
兼門下侍郎范純仁為尚書右僕射兼中書侍郎壬
午以觀文殿學士孫固為門下侍郎劉摯為中書侍郎
王存為尚書左丞御史中丞胡宗愈為尚書右丞戶
部侍郎趙瞻簽書樞密院事癸巳詔定職事官歲舉
升陟人數丁酉阿里骨來貢庚子詔天下郡城以地里
置壯城兵額禁勿他役五月癸亥漢東郡王宗瑗薨

六月癸未詔司諫正言殿中監察御史做故事以升
朝官通判資序歷一年者為之辛丑夏人寇塞門砦
甲辰五色雲見秋七月戊申荆王額薨戊辰夜東北
方明如晝俄成赤氣中有白氣經天辛未太白晝見
癸酉忠州言臨江塗井鎮雨黑黍八月戊寅阿里骨
入貢己卯進封揚王顯為徐王辛巳復置荆門軍丙
戌罷吏試斷刑法丁酉渠陽蠻入寇辛丑降繫囚罪
一等杖以下釋之九月庚申禁宗室聯姻內臣家乙
丑阿里骨復遷職加封邑詔觀察使以上給永業田
丁卯御集英殿策賢良方正能直言極諫科十月丙

戊詔罷新創諸堡砦廢渠陽軍戊戌復南北宣徽院
十一月甲辰遣吏部侍郎范百祿等行河丁卯太食麻
囉拔國入貢詔歲以十月給巡城兵衣裘十二月丁
酉渝州獵人寇小溪壬寅白虹貫日閏月癸卯朔頒
元祐式甲辰范鎮定鑄律度量鍾磬等以進令禮部
太常參定戊申減宰執賜子庚申置六曹尚書權官
丙寅詔吏部詳定六曹重複利害以聞是歲三佛齊
于闐西南蕃入貢天下上戶部主戶二百一十三萬
四千七百三十三丁二千八百五十三萬三千九百
三十四客戶六百一十五萬四千六百五十二丁三

百六十二萬九千八十三斷大辟二千九百一十五

人

四年春正月壬申朔不受朝群臣及遼使詣東上閣
門內東門拜表賀丙子宴遼使于紫宸殿甲申以夏
人通好詔邊將毋生事二月甲辰呂公著薨庚戌白
虹貫日乙卯夏人來謝封冊三月己卯作渾天儀胡
宗愈罷丁亥以不雨罷春宴己丑詔自今大禮毋上
尊號辛卯書有流星出東方癸巳錄囚乙未罷幸瓊
林苑金明池夏四月乙巳呂大防等以久旱求罷不
允丁未曹佺薨戊申罷大禮使及奏告執政加賜戊

午立試進士四場法壬戌弛在京牧地與民五月癸酉詔自今侍讀以三人為額中丞李常侍御史盛陶坐不論蔡確改官辛巳貶觀文殿學士蔡確為光祿卿丁亥復貶確為英州別駕安置新州丁酉于闐國來貢六月甲辰范純仁王存罷丙午以趙瞻同知樞密院事戶部尚書韓忠彥為尚書左丞翰林學士許將為尚書右丞丁未夏國來貢癸丑邈黎國般次冷移四林栗迷等齎于闐國黑汗王及其國蕃王表章來貢秋七月丙子詔復外都水使者丁丑遼國使蕭寅等來賀坤成節曲宴垂拱殿庚辰安燾以母憂去

位八月壬寅勅郡守貳以四善三最課縣令吏部歲
上監司考察知州狀辛酉太皇太后詔今後明堂大
禮毋令百官拜表稱賀九月戊寅致齋垂拱殿己卯
朝獻景靈宮辛巳大饗明堂赦天下百官加恩賜賚
士庶高年九十以上者乙酉加賜韓縝范純仁器幣
有差乙未檢舉先朝文武七條戒諭百官遵守冬十
月辛丑西南程蕃入貢丁未龍蕃入貢戊申翰林學
士蘇轍上神宗御集藏寶文閣癸丑御通英殿講官
進講三朝寶訓十一月庚午勅朝請大夫以下進士
為左餘為右溪洞彭儒武等進溪洞布癸未以孫固

知樞密院事劉摯為門下侍郎吏部尚書傅堯俞為
中書侍郎乙酉有星色赤黃尾跡燭地己丑太皇太
后却元日賀禮令百官拜表庚寅張惇買田不法降
官辛卯改發運轉運提刑預妓樂宴會徒二年法十二月
庚子遼使耶律等賀興龍節曲宴垂拱殿癸丑更定
朝儀二舞曰威加四海化成天下甲寅減鄜延等路
戍兵歸營戊午以御史闕令中丞兩省各舉二人是
歲夏國遼黎大食麻囉拔國入貢

五年春正月丁卯朔御大慶殿視朝丁丑朝獻景靈
宮二月丁酉罷諸州軍通判奏舉改官已亥夏人歸

永樂所掠吏士百四十九人庚子加溪洞人田忠進等九十二人檢校官有差辛丑以旱罷修黃河癸卯禱雨嶽瀆罷浚京城壕丁未減天下囚罪杖以下釋之庚戌文彥博以太師充護國軍山南西道節度等使致仕令所司備禮冊命壬子彥博乞免冊禮從之甲子宴餞文彥博于玉津園三月丙寅朔趙瞻薨丁卯詔賜故孫覺家緡錢令給喪事壬申以韓忠彥同知樞密院事翰林學士丞旨蘇頌為尚書左丞癸未罷春宴壬辰罷幸金明池瓊林苑夏四月癸卯詔鄭穆王巖叟等同舉監察御史二員甲辰呂大防等以

早求退不允丙午孫固薨癸丑詔講讀官御經筵退
留二員奏對通英閣丁巳詔以早避殿減膳罷五月
朔日文德殿視朝辛酉以保寧軍節度使馮京為檢
校司空五月壬申詔差役法有未備者令王巖叟等
具利害以聞乙亥雨已卯御殿復膳六月辛丑錄囚
癸亥書有五色雲七月壬申涇原路經略司言諸人
違制典買蕃部田土許以免罪自二頃五十畝以下
責其出刺弓箭手及買馬備邊用各有差乙酉夏人
來議分畫疆界九月丁丑詔復置集賢院學士冬十
月癸巳罷提舉脩河司丁酉詔定州韓琦祠載祀典

十二月辛卯朔許將罷安康郡王宗隱薨丙辰禁軍大閱賜以銀牒匹帛罷轉資是歲東北旱浙西水災賜宗室子授官者四十四人斷大辟四千二百六十有一高麗于闐龍蕃三佛齊阿里骨入貢

六年春正月辛酉朔不受朝群臣及遼使詣東上閤門內東門拜表賀癸酉詔祠祭游幸毋用羔二月辛卯以劉摯為尚書右僕射兼中書侍郎龍圖閣待制王巖叟簽書樞密院事癸巳以蘇轍為尚書右丞宗室士俛追封魏國公庚子拂菻國來貢丁丑授阿里骨男溪邦彪錢為化外庭州團練使三月癸亥呂大

防上神宗實錄己巳御集英殿策進士庚午策武舉
癸酉詔御史中丞舉殿中侍御史二人翰林學士至
諫議大夫同舉監察御史二人丙子呂大防特授右
正議大夫壬午賜禮部奏名進士諸科及第出身九
百五十七人丁亥罷幸金明池瓊林苑夏四月乙未
復置通禮科丙申詔恤刑辛丑詔大臣堂除差遣非
行能卓異者不可輕授仍搜訪遺材以備擢任夏人
寇熙河蘭岷廊延路壬寅太白晝見壬子賜南平王
李乾德袍帶金帛鞍馬五月己未朔日有食之罷文
德殿視朝庚辰詔娶宗室女得官者毋過朝散大夫

皇城使丁亥後省上元祐勅令格六月壬辰錄四甲
辰置國史院修撰官乙卯詔以田思利為銀青光祿
大夫充溪洞都巡檢秋七月癸亥復張方平宣徽南
院使致仕乙丑復制置解監使己卯振兩浙水災八
月己丑三省進納后六禮儀制辛卯詔御史臺臣僚
親亡十年不葬許依條彈奏及令吏部檢察己亥改
宗正屬籍曰宗蕃慶系錄令文武臣出入京城門書
職位差遣姓名及所往己酉修神宗宗寶訓癸丑詔鄜
延路都監李儀_等以違旨夜出兵入界與夏人戰死不
贈官餘官降等乙卯夏人寇懷遠砦閏月壬戌嚴飭

陝西河東諸路邊備甲子太白書見庚午詔御史中丞舉殿中侍御史二人翰林學士中書舍人給事中舉監察御史四人壬申太子太保致事張方平辭免宣徽使不允甲申刑部侍郎彭汝礪與執政爭獄事自乞貶遂詔改禮部侍郎九月丁亥夏人寇麟府二州壬辰詔州民為寇所掠廬舍焚蕩者給錢帛踐稼者振之失牛者官貸市之癸巳御集英殿策賢良方正能直言極諫科丁酉御試方正王普等遷官有差歲出內庫緡錢五十萬以備邊費甲辰幸上清儲祥宮壬子宮成減天下四罪一等徒以下釋之癸丑以

執政官行謁禁法非便詔有利害陳述勿禁冬十月
丁卯有流星晝出東北庚午朝獻景靈宮還幸國子
監賜祭酒豐稷三品服監學官賜帛有差庚辰令諸
官院建小學貴妃苗氏薨癸未編修神宗御制各官轉
秩加賞詔京西提刑司歲給錢物二十萬緡以奉陵
寢十一月乙酉朔劉摯罷壬辰作元祐觀天曆尚書
右丞蘇轍罷知絳州辛丑傳堯俞薨十二月戊辰開
封府火壬申范純仁以前禦敵失策降官是歲兩浙
水定州野蠶成繭高麗交趾三佛齊入貢

七年春正月甲辰以遼使耶律迪卒輟朝一日乙巳

張誠一以穿父墓取犀帶責授左武衛將軍提舉亳州明道宮二月丁卯詔陝西河東邊要進築守禦城砦三月己亥錄囚夏四月己未立皇后孟氏甲子命呂大防為皇后六禮使甲戌立考察縣令課績法五月戊戌御文德殿冊皇后庚子罷侍從官轉對丙午王巖叟罷知鄭州大食進火浣布六月辛酉以呂大防為右光祿大夫蘇頌為尚書右僕射兼中書侍郎韓忠彥知樞密院事蘇轍為門下侍郎翰林學士范百祿為中書侍郎翰林學士梁燾為尚書左丞御史中丞鄭雍為尚書右丞戶部尚書劉奉世簽書樞密

院事甲子置廣文館解額戊辰渾天儀像成甲戌日
旁五色雲見七月癸巳詔修神宗史復翰林侍講學
士已酉詔諸路安撫鈐轄司及西京南京各賜資治
通鑑一部庚戌宗室總麻以上者禁折居八月丙辰
罷監酒稅務增剩給賞法己未詔西邊諸將嚴備毋
輕出兵乙亥戒邊將毋掎克軍士前陷交趾將吏蘇
佐等十七人自拔來歸九月戊戌詔冬至日南郊宜
依故事設皇地祇禮畢別議方澤之儀以聞己酉永
興軍蘭州鎮戎軍地震冬十月庚戌朔環州地震丁
巳陝西有前代帝王陵廟處給民五家充守陵戶丁卯

夏人寇環州十一月辛巳太白晝見甲申詔大中大
夫以上許占永業田丙戌于闐入貢庚寅帝齋大慶殿
辛卯朝獻景靈宮壬辰饗太廟癸巳祀天地于園丘
赦天下群臣中外加恩罷南京榷酒民罹親喪者戶
以差等與免徭辛丑賜徐王劍履上殿十二月辛亥
阿里骨李乾德加食邑實封甲子罷飲福宴庚午祈
雪是歲兗州僊源縣生瑞穀高麗占城西南蕃龍氏
羅氏入貢

八年春正月己卯朔不受朝甲申蔡確卒丁亥御邇
英閣召宰臣讀寶訓庚寅詔復范純仁大中大夫壬

長幸太乙宮庚子詔頒高麗所獻黃帝鍼經于天下
二月己酉詔西南蕃龍氏遷秩補官辛亥禮部尚書
蘇軾言高麗使乞買歷代史及策府元龜等書宜却
其請不許省臣許之軾又疏陳五害極論其不可有
旨書籍曾經買者聽壬子詔刑部不得分禁繫人數
瘐死數多者申尚書省癸丑詔大寧郡王以下出就
外學三月甲申蘇頌罷辛卯范百祿罷庚子詔御試
舉人復試賦詩論三題夏四月丁未朔夏人來謝罪
願以蘭州易塞門若不許癸丑詔恤刑甲寅令范祖
禹依先朝故事止兼侍講丁巳詔南郊合祭天地罷

禮部集官詳議五月癸未置蘄州羅田縣丁亥罷二
廣鑄折二錢己丑錄囚辛卯監察御史董敦逸黃慶
基以論蘇軾蘇轍罷為湖北福建轉運判官己亥祁
國公偁為開府儀同三司六月戊午梁燾罷壬戌中
書後從省上元祐在京通用條貫秋七月丙子朔以觀
文殿大學士范純仁為尚書右僕射兼中書侍郎戊
寅令陝西沿邊鐵錢銅錢悉還近地八月丁未又雨
禱山川辛酉以太皇太后疾帝不視事壬戌遣使按
視京東西河南北淮南水災癸亥減京師囚罪一等
徒以下釋之丁卯禱于嶽瀆宮觀祠廟戊辰赦天下

庚午詔陝西復鑄小銅錢辛未禱于天地宗廟社稷
乙亥禱于諸陵九月戊寅太皇太后崩己卯詔以太
皇太后園陵為山陵庚辰遣使告哀于遼甲申命呂
大防為山陵使壬辰詔山陵脩奉從約諸道毋妄有
進助冬十月戊申群臣七上表請聽政戊辰徐玉顯
乞解官給喪詔不允庚午復內侍劉瑗等六人十一
月丙子始御垂拱殿乙未以雪寒振京城民饑壬寅
賜勞修奉山陵兵士十二月乙巳范純仁乞罷不允
甲寅倣唐六典脩官制丁己遼人遣使來吊祭出錢
粟十萬振流民己巳上太皇太后謚曰宣仁聖烈皇

后是歲河入德清軍決內黃口

本紀卷第十七

本紀卷第十八

宋史十八

開禧儀司王桂國錄軍國事兼相監修國史領經筵事都總裁等奉
勅修

哲宗二

紹聖元年春正月癸酉朔群臣詣西上閣門進名奉慰
丙申夏人來貢辛丑遣中書舍人呂希純等行河罷
河東大銅錢二月丁未以戶部尚書李清臣為中書
侍郎兵部尚書鄧潤甫為尚書右丞己酉葬宣仁聖
烈皇后于永厚陵己未祔神主于太廟癸亥減兩京
河陽鄭州四罪一等民緣山陵役者蠲其賦甲子詔

依章獻明肅皇后故事罷避高遵惠諱三月壬申朔
日有食之乙亥呂大防罷庚辰詔大學合格上舍生
推恩免省試附科場春榜乙酉御集英殿策進士丁
亥策武舉戊子以徐王顥為太師徙封冀王癸巳詔
振京東河北流民貸以穀麥種諭使還業蠲是年租
稅丁酉賜禮部奏名進士諸科及第出身九百七十
五人蘇轍罷夏四月乙巳朔阿里骨進獅子丙午以
旱詔恤刑己酉詔中外決獄庚戌詔有司具醫藥治
京師民疾壬子蘇軾坐前掌制命語涉譏訕落職知
英州癸丑改元白虹貫日甲寅以王安石配饗神宗

廟庭蔡確追復右正議大夫戊午復新城兩廂庚申
減四京囚罪一等杖以下釋之士戌以資政殿學士
章惇為尚書左僕射兼門下侍郎范純仁罷丙寅罷
五路經律通禮科丁卯詔諸路復元豐免役法戊辰
同修國史蔡卞請重修神宗實錄閏月壬申復提舉
常平官癸酉罷十科舉士法甲申以觀文殿學士安
燾為門下侍郎丙戌復義倉丁亥詔神宗隨龍人趙
世長等遷秩賜賚有差戊子詔在京諸司所受傳宣
中批並候朝廷覆奏以行乙未西南張蕃遣人入貢
丙申命左僕射章惇提舉脩神宗國史丁酉詔添差

徐州兵馬都監五月壬寅罷修官制局甲辰罷進士
習試詩賦令專二經立宏詞科已酉脩國史曾布請
以王安石日錄載之神宗實錄太白書見辛亥劉奉
世罷癸丑詔中外學官非制科進士上舍生入官者
並罷編類元祐群臣章疏及更改事條甲寅右正言
張商英言先帝謂天地合祭非古詔禮部太常詳議
以聞乙丑鄧潤甫卒丁卯嗣濮王宗暉薨六月甲戌
來之邵等疏蘇軾詆斥先朝詔謫惠州丙子罷置制
解鹽使壬午封高密郡王宗晟為嗣濮王癸未以翰
林學士承旨曾布同知樞密院事甲申除進士引用

王安石字說之禁秋七月丁巳以御史黃履周秩諫
官張商英言奪司馬光呂公著贈謚王巖叟贈官貶
呂大防為秘書監劉摯為光祿卿蘇轍為少府監並
分司南京梁燾提舉舒州靈仙觀戊午詔大臣朋黨
司馬光以下各輕重議罰布告天下餘悉不問議者
亦勿復言八月丙戌召輔臣觀稼後苑日有五色雲
壬辰應制科趙天啓以累上書狂妄黜九月癸卯遣
御史劉拯按河北水災振饑民丙午御集英殿策賢
良方正能直言極諫科庚戌罷制科罷廣惠倉癸丑
令監司歲察守臣課績優者以聞甲寅知廣州唐義問

坐棄渠陽砦責授舒州團練副使庚申太白晝見丁
卯詔京東西河北振恤流民戊辰流星出紫微垣冬
十月丙申三佛齊遣使入貢丁酉河北流■十一月
己亥朔復八路差官法壬子以冬溫無雪決繫囚蔡
確特追復觀文殿大學士甲寅開封男子呂安斥乘
輿當斬貸之丁巳詔河北振饑諸路恤流亡官吏有
善狀才能顯著者以聞十二月辛未申嚴銅錢出外
界法庚辰命諸路祈雪丙戌滑州浮橋火己丑漳河
決溢浸洺磁等州令計置堙塞甲午范祖禹趙彥若
黃庭堅坐史事責授散官永豐黔州安置是歲京師

疫洛水溢太原地震河北水發京東粟振之

二年

春正月

甲辰詔國史院增補先帝御集丙午立宏

詞科己未遷奉太平興國寺三朝御容于天章閣乙
丑殿前司奏獄空詔賜緡錢二月乙亥呂大防以監
修史事貶秩分司南京安州居住辛巳出內庫錢帛
二十萬助河北振饑甲午罷廣文館解額三月己亥
宗晟薨己未試宏詞黃符等五人各循一資夏四月
戊辰詔職事官罷帶職朝請大夫以下勿分左右易
集賢院學士為集賢殿修撰直集賢院為直秘閣集
賢校理為秘閣校理壬申封華容郡王宗愈為嗣濮

王詔許將等七人不限資格各舉才行堪備任使者
二人丁亥詔依元豐條置律學博士二員五月乙巳
命蔡卞詳定國子監三學及外州州學制乙卯上皇
太妃宮名曰聖瑞六月壬辰禁京城土人輿轎秋七
月丙辰詔大理寺復置右治獄仍依元豐例添置官
屬八月壬申命彰信軍節度使宗景為開府儀同三
司封濟陰郡王甲申宗愈薨乙酉錄趙普後希莊為
閣門祗候九月甲午以安定郡王宗綽為嗣濮王壬
寅告遷神宗神御于景靈宮顯承殿癸卯詣景靈宮
行奉安禮戊申加上神宗謚曰紹天法古運德建功

英文烈武欽仁聖孝皇帝己酉朝獻景靈宮庚戌朝
饗太廟辛亥大饗明堂赦天下冬十月甲子鄭雍罷
癸酉告遷宣仁聖烈皇后神御于景靈宮徽音殿甲
戌詣宮行奉安禮以吏部尚書許將為尚書左丞翰
林學士蔡卞為尚書右丞辛巳進封真王顯為楚王
辛卯河南府地震十一月乙未安燾罷知河南府丙
申太白晝見戊戌范鍔自轉運使入對言有捕盜功
乞賜章服帝曰捕盜常職也何足言功黜知壽州甲
寅梁惟簡除名全州安置丙辰贈蔡確為太師賜謚
忠懷十二月乙丑復置監察御史三人分領六察不

言事令翰林學士蔡京御史中丞黃履各舉御史二人壬申白虹貫月戊子詔如元豐例孟月朝獻景靈宮是歲蘇州夏秋地震桂陽監慶雲見出宮女九十一人交趾三佛齊韋蕃阿里骨入貢

三年春正月庚子韓忠彥罷知真定府甲辰酌獻景靈宮遍詣諸殿如元豐禮庚戌引見蕃官包順包誠等賜賚有差詔鞫獄非本章所指而蔓求他罪者論如律乙卯詔戶部尚書勿領右曹戊午詔罷合祭間因大禮之歲夏至日躬祭地祇於北郊二月癸亥出元豐庫緡錢四百萬于陝西河東糴邊儲辛未復元

豐恤孤幼令癸酉罷富弼配饗神宗廟庭癸未詔封
濮王子未王者三人宗楚為南陽郡王宗祐為景城郡
王並開府儀同三司宗漢為東陽郡王乙酉宗綽薨
丙戌詔三歲一取旨遣郎官御史按察監司職事丁
亥夏人寇義合砦三月壬辰以禁中屢火罷春宴及
幸池苑不御垂拱殿三日癸巳夏人圍塞門砦丁酉
尚書省火戊午劍南東川地震己亥封宗楚為嗣濮
王辛亥封太寧郡王佖為申王遂寧郡王佖為端王
丁巳幸申王端王府夏四月辛酉罷宣徽使丙子詔
自今景靈宮四孟朝獻分為二日五月壬子太白晝

見丙辰錄四六月癸亥令真定立趙普廟乙酉立北郊
齊宮於瑞聖園秋七月庚戌依元豐職事官以行守
試三等定祿秩罷元祐所增聚議錢甲寅令熙河立
王韶廟八月辛酉夏人寇寧順砦壬戌日上有五色
暈下有五色氣己卯復置檢法官庚辰以范祖禹劉
安世在元祐中構造誣謗祖禹責授昭州別駕賀州
安置安世新州別駕英州安置九月己亥邈川首領
阿里骨卒己酉滁沂二州地震壬子楚王顥薨乙卯
廢皇后孟氏為華陽教主玉清妙靜仙師賜名冲真
冬十月丁巳朔以楚王薨罷文德殿視朝壬戌夏人

寇鄜延陷金明砦戊辰詔被邊諸路相度城砦要害
增嚴守備辛未西南方雷聲雨雹癸酉鍾傳言築汝
遮詔以為安西城十一月丁未章惇上神宗實錄庚
戌宴修實錄官十二月辛酉宗景坐以立妾罔上罷
開府儀同三司判大宗正司事癸酉置施州鑄錢廣
積監甲戌蔡京上新修大學敕令式詳定重修敕令
遺棄饑貧小兒三歲以下聽收養為真子祿是歲于
聞大食龜茲師王國西南蕃龍氏羅氏入貢宗室子
授官者四十六人

四年春正月丙戌朔不受朝群臣及遼使詣東上閤

門拜表賀班內外學制庚寅以阿里骨子瞎征襲河西軍節度使邈川首領甲午涇原路鈐轄王文振敗夏人于沒煙峽庚戌李清臣罷二月己未以三省言追貶呂公著為建武軍節度副使司馬光為清遠軍節度副使王巖叟為雷州別駕奪趙瞻傳亮俞贈謚追韓維到任及孫固范百祿胡宗愈遺表恩詔江淮巡檢依舊法招置士兵癸亥于闐來貢黑汗王攻夏人三州遣其子以聞丙寅夏人寇綏德城庚午詔國信使毋得以非例之物遣人使仍著條禁癸酉詔申王佖端王佶歲賜錢各六千五百緡丙子進神宗嬖

儀宋氏為賢妃己卯復元豐權茶法庚辰罷春秋科
癸未以三省言追貶呂大防為舒州團練使劉摯為
鼎州團練副使蘇轍為化州別駕梁燾為雷州別駕
范純仁為安武軍節度副使安置于循新雷化永五
州劉奉世為光祿少卿分司南京黜韓維以下三十
人輕重有差甲申降文彥博為太子少保閏月丙戌
朔張天說坐上書詆訕先朝處死壬寅以曾布知樞
密院事許將為中書侍郎蔡卞為尚書左丞吏部尚
書黃履為尚書右丞翰林學士林希同知樞密院事
癸卯大雨雹甲辰蘇軾責授瓊州別駕移昌化軍安

置范祖禹移賓州安置劉安世移高州安置己酉御
集英殿策進士庚戌策武舉三月壬戌夏人犯麟州
神堂堡出兵討之及進築胡山砦癸亥賜禮部奏名
進士諸科及第出身六百九人甲子詔武舉謝師古
等以遠人賜帛李惟岳以高年賜帛丁卯詔瀘南安撫
司南平軍毋擅誘楊光榮獻納播州疆土庚午夏
人大至葭廬城下知石州張構等擊走之甲戌幸金
明池丙子尅胡山新砦成賜名平羗砦辛巳西上閣
門使折克行破夏人于長波川斬首二千餘級獲牛
馬倍之壬午命官編類司馬光等改廢法度論奏事

狀夏四月丁亥令諸獄置氣樓涼窓設漿飲薦席扭
械五日一浣繫囚以時沐浴遇寒給薪炭甲午熙河
築金城關丙申詔發解省試添策一道丁酉進編臣
僚章疏一百四十三帙己亥呂大防卒于虔州庚子
知保安軍李沂伐夏國破洪州壬寅環慶鈐轄張存
入鹽州俘戮甚衆及還夏人追襲之復多亡失甲辰
置克戎砦平夏城置靈平砦丁未以西邊板築有勞
曲赦陝西河東路追貶王珪為萬安軍司戶參軍己
酉復文德殿侍從轉對五月丁巳文彥博薨辛酉以
皇太妃服藥及亢旱決四京囚壬戌詔陝西添置蕃

落馬軍十指揮丁卯廢衛州淇水第二馬監潁昌府
單鎮馬監辛未韓縝薨丁丑貶韓維為崇信軍節度
副使六月癸未朔日有食之丁亥太白犯太微垣戊
子宗楚薨丙申詔翰林學士吏部尚書各舉監察御
史二人丁酉環慶路安疆砦成詔防托蕃漢官賜帛
有差甲辰熙河進築青石峽畢工賜名西平乙巳保
寧軍觀察留後宗漢為開府儀同三司徙封安康郡
王己酉太原地震太白晝見秋七月壬子朔太白晝
見八月乙酉封湖州觀察使世開為安定郡王丙戌
鄜延將王愍復宥州戊戌封宗祐為嗣濮王築威戎

城巳酉彗出西方九月壬子以星變避殿減膳罷秋
宴詔公卿悉心修政以輔不逮求中外直言乙卯赦
天下出元豐庫緡錢四百萬付陝西廣糴詔歸明人
未給田者舍以官屋戊辰彗滅癸酉謁中太一宮為
民祈福丙子御殿復膳命宗景為開府儀同三司巳
卯封婉儀劉氏為賢妃冬十月戊戌宗景薨壬寅廢
安國安陽淇水監及洛陽原武監十一月丁卯詔諫議
大夫以上各舉監察御史一人癸酉貶劉奉世為隰
州團練副使柳州安置丁丑詔放歸田里程頤涪州
編管十二月癸未劉摯卒甲申曲宴遼使于垂拱殿

乙酉侍御史董敦逸坐奏對不實貶秩知興國軍是歲兩浙旱饑詔行荒政移粟振貸出宮女二十四人宣城民妻一產四男子于闐西南蕃羅氏入貢播州夷楊光榮等內附戶部主戶一千三百六萬八千七百四十一丁三千三十四萬四千二百七十四客戶六百三十六萬六千八百二十九丁三百六萬七千三百三十二大辟三千一百九十二人

元符元年春正月庚戌朔不視朝丙寅咸陽民段義得玉印一紐甲戌幸瑞聖園觀北郊齋宮二月丙戌白虹貫日庚寅詔建五王外第壬辰復罷翰林侍讀

侍講學士丁酉宗祐薨戊申知蘭州王舜臣討夏人
于塞外築興平城三月壬子令三省樞密吏三歲一
試刑法甲寅開楚州通運河丙辰米脂砦成丁巳五
王外第成賜名懿親宅戊午封宗漢為嗣濮王殺朱
崖流人陳衍壬戌申王似端王佖並為司空令太常
寺與閣門修定刈麥儀乙丑詔翰林學士丞旨蔡京
等辯驗段義所獻玉璽定議以聞戊辰吏部郎中方
澤等坐私謁后族宴聚罰金補外庚午幸申王府辛
未幸端王府甲戌進封咸寧郡王侯為莘王普寧郡
王似為簡王祁國公偁為永寧郡王丙子築熙河通

會閏夏四月庚辰世開薨甲申幸睿成宮及幸主簡
王府丙戌章惇等進神宗帝紀梁燾卒于化州壬辰
林希罷丙申建顯謨閣截神宗御集庚子幸睿成宮
壬寅學士院上寶璽靈光翔鶴樂章癸卯詔學官增
習兩經丁未魯布上刪修軍馬敕例五月戊申朔御
大慶殿受天授傳國受命寶行朝會禮己酉班德音
于天下減囚罪一等徒以下釋之癸丑受寶恭謝景
靈宮戊午宴紫宸殿庚申詔獻寶人段義為右班殿
直賜絹二百匹六月戊寅朔改元丙戌遣官分詣鄜
延涇原河東熙河按驗所築城砦甲午祭京等上常

平免役敕令秋七月乙卯詔增置大府丞一員乙丑
敕大禮五使自今並差執政官定為令丁卯令學官
試三經庚午詔范祖禹移化州安置劉安世梅州安
置王巖叟朱光庭諸子並勒停不叙壬申京師地震
八月丙子朔熙河蘭岷路復為熙河蘭會路庚辰詔
自今三省樞密院進擬在京文臣開封推判官武臣
橫班使副及諸路監司帥守並取旨召對丁亥詔侍
從中書舍人以上各舉所知二人權侍郎以上舉一
人仍指言所堪職任九月丁未以霖雨罷秋宴庚戌
秦觀除名移雷州編管癸亥賜王安石第于京師冬

十月乙未詔武官試換文資丁酉以河北京東河溢遣官振恤己亥夏人寇平夏城癸卯駙馬都尉張敦禮坐元祐初上疏譽司馬光奪留後授環衛官十一月壬戌朝獻景靈宮癸亥朝饗太廟甲子祀昊天上帝于園丘赦天下是歲澶州河溢振恤河北京東被水者真定府忻州野蠶成繭涇原路禽夏國統軍嵬名阿埋等高麗賸征西南蕃張氏羅氏程氏入貢西蕃首領李訛哆巴訕支呂承信等內附

二年春正月甲辰朔御大慶殿以雪罷朝羣臣及遼使詣東上閣門拜表賀羣臣又詣內東門賀如儀丁

卯出內金帛二百萬備陝西邊儲二月甲戌朔令監
司舉本路學行優異者各二人韋蕃入貢己卯詔許
高麗國王遣士賓貢辛巳增置神臂弓詔自今應被
旨舉官所舉不當具舉主姓名以聞甲申夏人以國
母卒遣使告哀且謝罪却其使不納戊子鄜延鈐轄
劉安敗夏人于神堆甲午大食入貢乙未詔吏部守
令課績從御史臺考察黜其不實者三月丙辰遼人
遣簽書樞密院事蕭德崇來為夏人請緩師仍獻玉
帶築環慶路定邊城丁巳秦鳳經略司言吳名革率
部族孳畜歸順詔名革補內殿承制首領李猷補右

侍禁及賜錢帛有差庚申知府州折克行獲夏國鈐
轄令王皆保乙丑祈雨己巳莘王保為司空夏四月
庚辰辛莘王府令廣西提點刑獄司兼領鹽事丙戌
築廊延河東路暖泉烏龍砦丁亥以旱減四京囚罪
一等杖以下釋之辛卯詔鞠獄徒以上須結案及審
錄覆奏然後斷遣不如令者坐之癸巳封永嘉郡王
偲為睦王遣中書舍人郭知章報聘于遼丁酉築威
羗城五月甲辰太白晝見庚戌築廊延路金湯城癸
亥奉遷真宗神御于萬壽觀延聖殿曲赦陝西河東
路減囚罪一等流以下釋之建西安州及天都等砦

乙丑進章惇官五等曾布三等許將蔡卞黃履皆二等辛未詔莘王保睦王偁母進封婕妤六月庚辰賜蘭會州新砦名會川城甲午賜環慶路之字平曰清平關戊戌築定邊白豹城訖工閣門使張存等轉官賜金帛有差秋七月乙巳盛暑中外決繫囚丁未放在京工役庚戌河北河漲沒民田廬遣官振之甲子知環州种朴獲夏國監軍訛勃囉丙寅洮西安撫使王瞻復邈川城西蕃首領欽彪阿成以城降八月癸酉章惇等進新脩敕令式惇讀於帝前其間有元豐所無而用元祐敕令脩立者帝曰元祐亦有可取乎惇

等對曰取其善者甲戌太原地震戊寅皇太子生辛巳降德音于諸路減囚罪一等流以下釋之乙酉賜熙河路緡錢百萬撫納部族丁亥修復會州癸巳太白晝見瞻征降甲午建葭蘆戍為晉寧軍丙申保寧軍節度呂惠卿特授檢校司空九月庚子朔夏人來謝罪癸卯命御史點檢三省樞密院並依元豐舊制甲辰幸儲祥宮乙巳幸醴泉觀丁未立賢妃劉氏為皇后己未青唐酋隴拶以城降壬戌雨罷秋宴甲子右正言鄒浩論劉氏不當立特除名勒停新州羈管丙寅御文德殿冊皇后閏月癸酉置律學博士負詔

詳議廟制以青唐為鄯州隴右節度邈川為湟州宗
哥城為龍支城俱隸隴右寅以廓州為寧砦城丙戌
果州團練使仲忽進古方鼎誌曰魯公作文王尊彝
甲午熒惑犯太微垣左執法己未越王茂薨冬十月
壬子詔河北大名二十二州軍置馬步軍指揮以廣
威保捷為名甲寅日有食之既十一月丁亥詔綏德
城為綏德軍壬辰詔河北黃河退灘地聽民耕墾免
租稅三年乙未詔諸州置教授者依太學三舍法考
選生徒升補是月河中猗氏縣民妻一產四男子
三年春正月辛未帝有疾不視朝丁丑奉安太宗皇

帝御容于景靈宮大定殿戊寅大赦天下蠲民租已
卯帝崩皇太后諭遺制立弟端王即位于柩前皇太
后權同處分軍國事四月己未上謚曰欽文睿武昭
孝皇帝廟號曰哲宗七月丁卯以謚號冊寶奏告天
地宗廟社稷八月壬寅葬于永泰陵癸亥祔太廟崇
寧三年七月加謚曰憲元繼道世德揚功欽文睿武
齊聖昭孝皇帝政和三年改謚憲元繼道顯德定功
欽文睿武齊聖昭孝皇帝

贊曰哲宗以冲幼踐阼宣仁同政初年召用馬呂諸
賢罷青苗復常平登俊良闢言路天下人心翕然向

治而元祐之政庶幾仁宗奈何熙豐舊姦姦去未盡
已而媒孽復用卒假紹述之言務反前政報復善良
馴致黨籍禍興君子盡斥而宋政益敝矣吁可惜哉

本紀卷第十八

字七十四个

吳貴才

吳貴才刊